


認
真
草
二





認
真
草

(二)



鹿善繼著

認真草卷五

篋餘

贈孫君兄弟廬墓序

嘗讀古忠臣義士孝子悌弟遺事。未嘗不掩卷興思。聳心起敬。人生幾何。獨此奇行懿蹤。歷千載猶有生氣。然古人也不可復作。何幸當吾世而得之。孫鍾元兄弟。孫氏容城著姓。先發其祥於敬所先生。又再傳至鍾元。綱其祖武。鍾元之同胞兄崇我。次相我。最少弟思皇。翩翩秀異。無忝八龍。遭其先人之變。相與廬墓。終喪鄉閭遠近。無論識不識。見者聞者。咸咨嗟太息。謂孫君兄弟千古人也。夫自穆叔論三不朽。而以立德爲太上。天經地義。百行之原。德孰有大於孝者。君家兄弟此舉。淳發於不自己之心。亦第以盡吾當日事。何暇計千古。然能爲當日者。卽爲千古矣。嘗嘆士生天地間。具鬚眉稱丈夫。亦爲之而已矣。不能爲所可爲。甚且爲所不可爲。甚者同禽獸行。不甚者亦同草木腐。故所稱當世名流。大都褒衣矩步。邊幅自持。間取一二迂節細目。無關綱維之事。不切名教之圖。稍稍點綴。便翹然以千古自許。而未識其能千古不也。君家兄弟皆以才名蜚聲諸生間。鍾元君復未冠而領鄉書。鄉人士亦嘖嘖嘆其靈異。然大概謂聰明穎秀。能成一世名。不意其成千古名也。卽不佞嘗一再識君家兄弟。自謂知之。繇今省之。則曩之知未也。夫漢世士舉孝廉。至今吾黨人率以孝廉名之。顧名思義。獨孫君始無愧耳。私嘗怪容城彈丸地。而先

有靜修後有椒山。迄今又有孫君兄弟。何物一撮土。多生千古人。或謂其左天津。右狼山。遠吞岫色。平揖巨浸。細纏靈氣。人不偶生。豈有然歟。夫徵書再至。雲臥益堅。靜修清矣。擊鸞不死。竟死擊嵩。椒山忠矣。一廬六載。孺慕終身。鍾元兄弟孝矣。子文之忠。文子之清。未知其仁。而伯夷之清。與尹惠。同仁比干之忠。與微箕。同仁此際。政須隻眼。仁者人也。親親爲大。則孝弟爲仁之本。固不問而知之者也。劉以高尚無愧。伯夷楊以死諫無愧。比干孫以純孝無愧。劉楊道不同而趨同。容城有三仁焉。不佞自慙曩之不深知孫君。又未始不自幸生之得當孫君。高風芳韻。千載後必聞之興起。豈其當吾世而失之。

周景文制義序

不佞觀政兵曹與景文同舍相善也。景文質任自然。了不作回互媿阿態。不佞私計。卽未睹若人文意。必吐露肝膽。而以風骨自勝者。已而以制義示不佞。則其人之概具在焉。向之私計。奇於射覆。因嘆天下事。患不眞耳。眞則源流較然。萬不失一。自江河不返。涉世既深者。工摸棱之術。自託於時中之道。藏頭蓋面。千工萬巧。圓轉滑澤。而其本色遂不復可辨。雖然。世不乏冷眼。卽以不可辨辨之矣。景文居京師。寡追隨。赴尚書期而外。左琴右劍。獨坐蕭然。間與不佞過談也。蓋其脫然聲利。得之天性。惟扼腕時事。浩焉興嘆。其意遠矣。大約吾輩肺腸。於世味不冷者。於名義必不熟。諸葛武侯鼎立三分。淚滴千古。都從淡泊甯靜中來。近世士大夫。宮室妻妾。靡焉自奉。其於公家事。度外置之。何怪焉。富而可求。執鞭所願。人自揣技能精魂。孰與尼山。而苦欲求勝。一開口。一舉足。不收間已。慊不慊。但問人喜不喜。枉爲造物笑耳。不佞椎指。

無似每執知命二字解嘲而嘲益起代不佞解嘲者獨有容城孫啓泰今年通籍復有景文景文就選當得司理一日過不佞適啓泰在坐戲謂世路羊腸若復能幅彊耶景文指心曰吾以眞是眞非聽之此君復指天曰吾以或利或鈍聽之彼君如斯而已啓泰笑曰此生幅彊猶昔景文制義若干首自言同筆硯者爲殷汝良子猶伯仲鄒虛王朱德升四君子夫不知其人視其友則四君子者不佞亦旣耳而目之矣

贈李司城考續序

李雲漢司城考續得恩命贈其父傑山公如己官母暨配俱稱孺人綸綺一時冠帔兩世榮矣夫國家鼓舞羣吏能其官者不難聖書寵之人臣展布四體以邀君貺不獨一雲漢而吾獨於雲漢三致意焉雲漢誠信人也余從孫國重啓泰兄弟識之退而謂天下人盡若雲漢官盡若雲漢結繩之治不難再見雲漢驟與人接不能營折感施作刺刺語而久之其意倍親腸肺較然其司城用法寬而持己介事上極敬而恥非道之說雖居劇職訟庭常聞每談當官之懷賤弄法羅織周內齒切髮鑿間有以夤緣捷徑之說進者則謝不敏卽素託深交稱引世變江河與汲長孺之論積薪雲漢以有命辭吁亦難矣世局之不可破有力者且靡于從風列在下僚夫復何言以資輕灰遠志以短步促雄心理有固然其無足怪而雲漢澹然漠然持之不變何爲者耶使雲漢而猶人之視其官也者七情五色且以有因而旁溢無主而自行又安能澹然漠然已也雲漢之持此亦曰聊以信吾心也成與敗非所敢知其至以宦成荷國恩也則公論

之不能盡滅。而天下事之猶可言也。因憶與習雲漢者居恆論列大概。謂雲漢於人無所不宜。唯不宜於官。而今何如哉。自持論者。分官與人而兩之。因襲既久。已如一成之案。既分人於官之外。遂鬻官於人之上。復溷官於人。而品人以官。余髮未燥。卽耳此論。而心非之。每求一人焉。間執持論者之口。幸有雲漢也。然亦已難矣。是役也。於雲漢不爲分外。唯是當今之世。以木彊之人。而亦得考績稱宦成。使論官者不至全遺人。而剩下趨上窺瞰迎合。未必爲天建地設不易之矩。則雲漢其左券云。

贈恆山徐使君膺臺薦序

子輿氏論入人之深。主仁聲而奴仁言。言自己出。聲自人出。己實有口。蓋千載於一言。何難者。人亦有口。夫其口衆我寡。數不勝也。他日論恭儉之實。痛黜夫聲音笑貌。總之所謂仁言也。俗吏情狀刻畫盡矣。余每與啓泰。盱衡宇內。嘆民生之不易。而太息於仁言仁聲之一語。恨吾生也晚。徒從臺簡。仰漢吏於希微。遼杳彷彿。疑似之間。不意乃得之於徐使君。使君治容。不數月。卽有聲。余猶疑俗吏新政局面也。已而聲益噪。遂心動。蓋至於今。而君之聲集於余之耳。雜沓重複。不可殫。且就人之口。得人之情。其感使君恩。口出不啻。且感生愛。愛生憐。憐生過計。反覆於不能已。展轉於不必然。蓋使君之爲容至矣。杜請謁。絕苞苴。問理徵收之間。如冰如雪。日惟求所以便百姓者。竭力從之。相沿積臺。次第剔盡。民卽欲求費一錢。而不可得。且也。旌節義。獎恬退。恤若敖之餒。繖惡璫之羽。高誼深心。每入人意中。又時出人望外。容人士戴天履地。居恆相謂。使君愛民過厚。治民過勞。持操過苦。民肥矣。君得無瘦乎。獲上治民。宣尼明訓。世局日變。

誰能於常格外待豪傑者。君之拮据專爲民矣。獨不爲官乎。是言也。愛使君非知使君也。智非不足。愛之過而智爲掩。其恐恐於獲上之不易。非爲使君。蓋自爲也。而使君今固獲上矣。繡衣阜囊。爭先推轂。容人者之說。謂獲上別有道。於是爲官爲民。若冰炭之不並立。並則戰。戰則告敗者。不問而知其所在。剝下似狼媚。上似狐。走朱提於密室。而閭閻若掃。至有謂入仕途不得不投絕交書於此心。尙可言哉。間有不能頓負初心者。乍王乍霸。忽主忽賓。當其所窮。本色立見。反不若純負其心。之蓋藏密機。智熟足以僞定一時也。耳食者不察。遽指爲口實。以伸其爲民不宜於官之橫議。此杯水車薪之說。與於不仁之甚者也。繇徐使君觀之。彼何嘗以獲上之念。雜其治民。而竟以治民者獲上。則天下患無真爲民者耳。爲民卽所以爲官。徐使君其證也。故仁言仁聲之旨。得使君而益信。而治民獲上之案。願從使君一翻之。宣尼謂治民必先獲上。余謂獲上必先治民。老吏舞文。能翻一成之案。使君治容。吏無敢舞文者。余之翻案。因啓泰以質諸使君。或不以舞文論也。

贈李茂林序

尼山思聖。而遞歸於有恆。他日稱引南人之言。而善之。余合而思焉。則作醫者必有作聖之心。然後可爾。蓋天下事最不利於巧人。人巧則變局多。爲人之外。若真而心未必也。爲人輕。則計算少。好淺嘗而不深入。苟且其術。自足其智。且急於潔己之名。而重於實己之言。潔己名則袖手。實己言則幸灾。故恆者。

作聖之心也。而作醫非此心不可。余閱人多矣。於醫中得李茂林。余婦病瀕危。茂林起之。母夫人病復藉以起。余因常侍茂林。而得其爲人之深。真有作聖之心者也。蓋余婦病積數年。經數醫至甲寅勢遂劇。他醫皆委以去。聞茂林名於郭爾祥。迎以至。蓋計無復之。不能坐視。姑盡人事耳。茂林一診。許以不死。他醫聞之傳笑。卽余亦未敢信而不忍疑也。起伏變化。病者之症狀與治病者之作用。俱極人耳目之所未經。而意想之所不到。當其變化時。余亦意恍神搖。不能控揣。惟舉以聽之。而竟藉以成功。相知者共詫其神異。傳爲奇事。然余至是而有感於醫之難。非徒爲不識病者難也。卽識病而用藥之際。稍失先後。著不可卽不失著。而病狀之方正忽歧。病勢之方減忽增。儘足以顛倒醫者而亂其計。卽醫能不亂。而主人甯保不駭。天下甯有討虜心不穩。而赤壁可以塵兵者。是役也。非余婦之病。不足現茂林之窺工極變。巧奪造化。而非茂林之得。竟其長。亦不足以起沈疴。而間執他醫之口。使茂林有潔其名之心。亦不肯以盛名之下。而殫力於他醫所望而卻走之病。至是則爾祥其子桑乎。與人之壹秦伯。亦欲分功矣。非真分功也。蓋以警天下之任醫不專。而自敗乃事者。茂林醫旣蜚聲。而日伊吾素問。且問業於數百里外之周氏。是豈不情之挹損。蓋爲人之念真。欲窮造化之奇。所謂有作聖之心也。人心惟恆。乃實而痛癢切。惟實乃虛。而自用黜。茂林茂林。進乎技矣。茂林不欲潔其名。而名益鵠起。迎者無虛日。所至奏效。遠近沐其澤。高其品。如出一口。丙辰之春。當事者嘉其行業。予以冠帶。親知爭以爲賀。而余之言若此。

重陽後明寰齋頭謙集序

明寰天下英偉開敏雅士也。早列膠庠。屢膺勸駕。既以數奇。幾成孤落。而氣能內守。志未中灰。乙卯學使者比諸士奇明寰文。拔高列餼之。諸相知過其門。而大嚼之時。值秋深。白雲浮座。黃菊迎尊。主人客卿。拓落之懷。更與高潔之景相對也。一石一斗量各自盡。卜晝卜夜。興猶未闌。酩酊強半。諸謹百出。則有一夫正襟危坐。昂首伸眉。爲莊語。以止衆譁。其言曰。名起於實。事成於志。觚之不觚。尼山增慨。士之不士。舉世若狂。士品有三。誰聞其上。山成一簣。誰啓其端。吾曹周旋有年矣。請勿論聖賢影樣。只簡自己肺腸。且勿謂世局行藏。只對生來面目。天地生成。國家作養。有愧無愧。自知之耳。故士之自負也。卽遊庠時而已。然士之負國家也。自食廩時而漸甚。甚至於肉食貽譏。覆餗有戒。則其濫觴耳。盱衡宇宙。振腕江河。其庸庸者。指聲色臭味。謂性醉生夢死。與草木同腐朽。其皎皎者。竊堯舜周孔之論。翻雲覆雨。且爲天地罪人。當是時。談鋒太厲。滿座斂容。醒者解謔者止。銀盤輝煌中。不僅秋色襲人也。則又有嗔其滅興而讓之者。曰子言誠善。然謔會非伊川之座。且身非伊川而襲其口。模擬總真。祇成優孟。請子閉口。吾黨開樽。夫夫顏汗。語塞塵尾。不揚明寰意不忍也。進夫夫而慰之。請參曰。天下事有不必相同。而不可相非者。則今日之事。開樽揮塵。兩存無害也。因並述之。

建胡芳宇邑侯祠疏

穉惟扶輿有正氣。開晦暝於一方。崇報自公心。奉明禋於百代。事屬盛舉。議協輿情。故邑侯胡公。千載真品。當世偉人。天於河洛。產英雄。民向范陽。識父母。追憶下車之始。適當大壞之時。銳意擔當。不懈勞怨。才

敵八面守空一囊禁衙役之追呼革富民之供應省驛遞則一夫一馬不作人情寬鋪家則一菜一羹必用市價去催頭之擾而花戶遂免漁侵嚴盜賊之防而閭閻夜無尨吠肥民瘠己兩目欲枯釐弊剔奸寸心幾嘔均攤以變墩夫之米而安堵千門設處以賑水潦之民而生春萬籟問理則恥談紙曠徵收則絕意羨金批決一朝而案無宿事番休諸役而庭有餘閑澹薄自甘往來之餽遺盡謝威儀極簡經過之雞犬不驚既矢志於澄清更虛心於採紬培養士氣繩督考課之文轉移民風申明齊家之律重繼絕之義則若赦之鬼不憂除武斷之雄則吞舟之魚不漏至當大節尤見剛腸百折必東一官似葉但欲爲地方砥柱何知有身世風波撥亂定傾兆已行於期月批卻導默成可望于三年誰知萎嘆哲人詎意運阨陽九河山莽莽堪悲任事之魂風雨瀟瀟想見憂民之淚明德遠矣生氣凜然赤社億萬家傳聞父老琴堂二百載僅見神君志未盡酬天不可問然丈夫不朽原非論年直道猶存惟思報德各隨力量共事經營諒響應之如雲期功成於不日

答范景龍書

得足下所以治環者而躍躍喜也讀書男子南面親民甫下車即舉地方相沿大蠹而去之若脫轉盼之間乾坤頓改彼環人士感深望外且驚其從何處得來而無愧爲環縣令也者固無愧爲范先生子也是役也不負天子爲忠於君不墜家聲爲孝於親而二三知己生平期許不成畫餅也爲信於友大約天下之大手段從真肺腸中得之欲則不剛千古明訓吾輩一文不愛何事不可爲者足下旣透此關批卻導

竊游刃有餘矣。惟是世變滔滔，黨同伐異，任重道遠，謹始慮終，往常書本生活到此躬行實踐，別有光景。如人飲水，冷暖自知。愛莫爲助，則有先勞無倦之言，在足下以爲何如。

認眞草卷六

農曹草

催用巡倉御史疏代李大司農

爲漕儲立等入倉巡視尙稽俞旨三憲聖明卽賜批發以襄國軍大計事雲南司案呈照得每歲漕糧抵壩入倉全藉憲臣以爲彈壓都察院題差王御史本都兩疏題催未奉俞旨見今漕糧齊集通灣巡視萬難再緩呈乞再行題催等因到部臣竊惟國事有重輕時勢有急緩使事非喫緊臣何能妝點本輕者以爲重使時尙可待臣何樂張皇可緩者以爲急而數百萬漕糧之爲國家大計皇上之所素晰也巡倉御史之爲漕糧重寄皇上所明知也巡視缺則抵壩者不能入倉又皇上所熟諳也據臣一疏再疏已無未盡之辭至於再疏復爲留中而漕糧遂雲集於通灣矣院臣亦念事勢旣迫具疏以催蓋與臣切同心之憂爲協力之謂蒿目引領望明旨之一允而猶未得也前尙謂按期入倉今則立等入倉矣前尙謂命難再緩今則已屬旣緩矣舳艤相接如鱗如蝟盼盼焉冀旦夕收納以結經年之局蘇萬里之勞祇爲倉臣未奉俞旨停泊波心翹翔水次唾手可完之事稅駕無期拊心暴露之虞息肩何日此臣之所審度情形而深有慮也且事失常則奸宄乘日持久則屑越滋前止慮耽閭閻隘窟之中釀插和侵漁之弊而今則弊不止此院臣所稱漂沒可慮燬壞可慮頭幫旣壅後幫盡壅可慮者語語切中皇上靜言思之必有惺然

得其故者不待辭之畢已夫先事無人猶待臨事臨事無人更待何時辛苦粒粒實耗於當入不入之餘困窮嗷嗷望穿於將得未得之際計出無聊抑且奈之何哉當是時縱不念物力當念人心縱不慮事體當慮國計又臣所中夜思之徬徨而不能寐者也夫巡漕巡倉事屬一體乃巡漕受命半載而巡倉停閣至今題催至再天聽彌高收者無人運者誰歸使漕臣之半歲勤劬者祇付諸水濱不得及時入倉濟公家之用得無於亟命漕臣之意或相反乎臣於此事至三爲補牘而辭益重複情益急迫非爲倉臣爲漕也亦非爲漕糧爲國也皇上洞悉國計斷不謂漕糧既至可不入倉斷不謂漕糧入倉可無憲臣則巡倉御史之命是豈容暫緩一時姑待明日者耶伏乞聖明深省急務速換允綸命御史王象恆卽日受事其於軍國大計非小補矣

送張明衡擢守大同序代李大司農

天下事總於六曹六曹誠職其總矣而自其各爲總也又職其分曹郎受事又各就所司而竭精力以從之敢問職以外哉然曹郎之能其職者率徼天子寵命出視郡事郡無論煩簡總字下諸城而南面臨之抱案之吏以次稟成蓋六曹之事具在焉夫以曩之兢兢職分猶懼不給者至是全而付之不虞其難勝而曹郎出守亦往往以功名自見人不得以不習傲也此其故可思也尼山就誦詩三百者恨其不達于政他日與康子論從政而以達之一言爲端木子許則天下事若以其局錢穀兵刑緒別派異惟就局而繹其端於何來委於何竟互爲主客密相經緯一局之中而全局之所爲備達者自能辨之耳故達之一

言其機在呼吸一氣之中而其用在果藝諸長之上史臣之于賈洛陽曰通達治體是可爲知者道也張君起家進士釋褐授廷評以讞獄廉平晉地曹郎余與共事借箸之餘動中卻竊及司倉庾其推明允庶幾孔子之所謂達者余方借其心計共濟時艱而今且奉命守大同夫大同與虜爲隣所稱京師後門也則守視他郡尤不易天子注意北門慎擇鎮鑰非得達如張君亦何以勝其任而愉快乎然余又非獨爲大同快也天下之患莫大乎此作而彼不應郡與部不相應也邊與腹不相應也吏與將不相應也兵與餉不相應也共事一主誼比同舟豈其盡出挾私而故爲柄鑿彼固實不達耳人而不達不知其可而尤不宜於邊郡守文吏也而與將參居所治者民也而與兵雜處邇來武備之弛不可問而徒以膏血飽無厭之口腹屯鹽之法不可復而徒以歲例求如洗之太倉不有達者以處於其間則奉行與考成不相應而扞禦與守衛不相應國事何賴焉而幸借張君以往也不應之患吾知免也故士君子患不達耳如其能達則自地曹郎而出守其作用當別蓋合邊腹兵餉將吏之要領無不備於地曹肯綮素嘗一局而了全局之用威望風采且視分司時更倍矣則余之深有藉於張君亦更倍爲曹郎時也

故嘉祥縣知縣警愚馬公墓誌銘

吏治之壞大要苦資格之易拘憂公論之常晦繇是寘其人之可爲者而尤其天之未定者志士熟腹强悍灰矣警愚馬公非孝廉起家乎又非位不鬯才伸不補屈抱恨長逝者乎何關西之政媲美漢庭且不然之灰尸祝轉切也公舉於鄉以己卯筮仕同官以最遷矣而以蜚語謫一署汲以賑饑聞再署密以振

廢聞薦補偃師革倉吏之鋪墊除交界之送迎歲省無算未踰月以艱歸服闋補嘉祥二十日而沒故惟在同最久治狀最著入人最深嘗得交于伯子濂仲子潔悉其概公有大造于同非別求利之去其害焉者而已同舊徵糧催以十排侵欺擾害而糧益逋且上嚴爲提絕絃以應刑煩民急假貸求免令豪右收息逾月倍母公去十排限民自納提者傍午具民窮以請曰無官猶可無民可乎上官心重之稍稍聽公糧遂報完榮及所生此同官百餘年僅見事也漆同二水合爲城患歲一脩之額派麥三千六百石公念患無已時起隄抗水使不復西額派遂除植隄以柳且成官路民碑之曰馬公隄志永賴云秦府酒瓶取給於同歲差四校尉橫索無度公至而校尉以故態來公杖之以橫狀啓王且請縣自送不勞差也王感悟慰勞公費減十九矣同民貧而役煩公革大戶斗級司兵民阜快六十四名歲省千緡事亦畢集至於窩訪公行孫承恩九家爲之魁公召面詰與之約一人中傷則九人立斃耳九人崩角丐生請得自新閭境帖然公在同五年釐姦剔弊瘠已肥民絕無一事不爲民而自爲者徵糧嚴禁多收傾解總付大戶或謂公貧可藉羨養廉徒入猾役手何益公謝曰官有常俸何貧也多收有禁羨能幾何與其割人肉充己腹無甯本地錢贍本地人耳時守西安者曹楚石璜雅重公之爲人暗書公號於屏曰真君子公再舉卓異尋擬內召未幾陞練兵同知復以直指某論劾謫河南簡較蓋耀州鄉紳某實中之某佃同地百七十餘頃而不稅公以法繩之某佯謝過而陰脩郤會直指爲所善友遂以一例徵糧劾公先是同官之糧夏秋驛站廩祿各其田公謀曹公條鞭之而田大均及坐劾曹詣直指白其狀直指尋悟然奏行無及矣公

離同之十四年同人建祠立碑祀學宮且移文定興若曰爲同之真名宦也者是卽定之眞鄉賢又四年更於西山高敞創大楹以鑑空衡平風清月明書其額歲時祭焉蓋公之論至是乃大定聞某鄉紳已餒若敖矣公得陽明之說于徐獻和先生尺寸取則焉自奉極儉而好施予塾師尹翁生有養死有葬親友困饑賴公遂其婚嫁者不一而足里居遇歉轉貸五十金濟之及其當官爲民請命不避彊禦而尤加意人文持其師說爲諸士講解諸士興起文明其地嘗問同士不登幾六十年丙午雋者卽當年所首拔也優免闈庠實以二丁李維亨等數人貧不能娶代爲具幣馮生光昇廬母之墓歲給銀米月三視焉謁姜女祠嫌其不聳創字樹碑且入祭典其重名教崇節義又豈可爲俗吏道哉蓋得於學力深矣公名鐸字振之警愚號也以嘉靖丙午生萬歷癸卯卒得壽五十有八配盧孺人有相德公之樹立助不淺焉後公一年生後公十一年卒父雲路以公考滿封文林郎母毛贈孺人丈夫子二廉潔皆庠生各再娶爲紀爲尙爲楊爲田女一適牛化麟孫男五憲娶龔繼李柟娶薛如飛如阜秋魁尙幼孫女六配許國瑚薛士璣庠生李渭范士楫二未字鹿子曰余總角從先大父壁屏間得公之體貌彼時顓蒙不解所抵掌者何言第見賓主之驩然相向若各有得也及齒加長稍涉世思奉教於君子而已不可得乃讀公之狀而論次之夫治民在去害知之待中智哉然口談身任難易懸矣內有不能饜之腹外有不可返之勢愛一錢者烏能爲公所爲卽不愛錢而不能不愛官者又烏能爲公所爲間執苦資格憂公論者之口而翻其案則有公之行實在余旣爲之誌復系以銘銘曰

公因貝錦吾以咎人公困尸讒吾以咎天然論天道者原於既定而稱不朽者非以引年彼無噍類公有桂蘭彼腐草木公瓦河山吾反覆於羿奡禹稷之論而信恢恢者永操不漏之權

沐陽縣知縣泰宇孫公行略

公諱重捷字聯芳別號泰宇徐州公三子長重振次重陽公其季也幼有慧質未弱冠即指掌千古及昭代典故識者覘其遠志每試輒冠諸生名嶽嶽起已而屢困畿闈人代爲侘傺而公無幾微見績學不輟乃以丁酉薦嚮用有階益自發舒是時公長子可甲已露頭角公自課課子深居簡出下撻篝燈丙夜猶熒熒也遠近親識居恒稱人倫之盛必推公父子隱然爲一方重可甲復舉於己酉鄉邦口實三酉堂不啻膾炙蓋徐州公之領鄉書亦以前己酉云庚戌公父子俱上春官見者聞者指爲威鳳挈雛名動京師而可甲一夕暴亡公自是於邑不自得歸嬰危疾稍間癸丑謁選得沐陽任未幾疾復作卒於官余知公久悉其行事服其德器公素性嚴重非人不友頗得簡貴聲而持守典刑不失尺寸物望都焉丁內外艱杜門讀禮稻錦不御伯兄病侍榻前晝夜不解帶人皆感嘆子姓蕃殖不無參差得公一言人人意消終公之世無扞罔者當時亦不自覺今且動事後之思矣同邑陳公可成任宜陽歿而無嗣室人不給朝夕孫公奇逢方議爲立嗣而苦於難合公力贊之捐貲以從其事遂成邑有橫璫與同袍某相構當事者爲公舊知而人以公先有小嫌意其難之公毅然曰袁絲變色李膺抽戶此其時也何問其它爲之周旋不遺餘力是豈可以淺深測哉公方盛時稱天下事未可量蓋揣摩簡鍊已得要領時爲親知借箸無遺策

邑中制作多出公手。蓋邑令重其爲人，往往就公決大疑。又以公不私謁，無從借手報也。頗抱平原之憾矣。據公之遠志積學，若天有意者，使竟其所長，當非小補。乃困至中年，猶未脫諸生。卽牛刀小試，而猶奪之速，天可問哉。沐陽席未煖，病遂不起。然聞公始至淮安守詹，卽以查鹽務命公力辭之。素操亦見一斑矣。公生於嘉靖三十八年二月二日，卒於萬曆四十三年正月十三日，配何氏。先公一年生，後公一年卒。長男可甲，己酉舉人。嗣孫紹宗，次男可第，庠生。又次可登，俱早夭。無嗣。其先世系載在徐州公誌中。

寄周景文書

癸丑之役，抵家晤舊，必以兄爲談柄。每自詫有緣天下第一流爲我所得。今秋謁還，會徐春字年兄，得聞兄設施風采，踴躍欲飛，感慨用壯，亟歸邸。與啓泰道之，以昔所見合今所聞，想像葉視一官爲民請命，勃勃情狀，弟卽弱骨，兩腋習習矣。固知事原可爲，人在自立，獨不得如兄數輩布列樞要耳。何難太平哉。因沽酒相慶，大醉酣歌，適值雷雨，聲勢相抗。當是時，既以隻眼自雄，復以熱腸相對，誦唐人海內知己，天涯比隣之句，迥然神往。眞宰有靈，或當飛入兄蝴蝶夢也。人事錯雜，未暇詳書。慶幸之私，直道其大意如此。

與袁滄孺書

某何幸而筮仕之始，奉教大賢，憂積蠹於攢眉，列嘉猷於指掌。某卽腐儒，自謂有心，倘借不倦之教，略通世務，爲公家效一臂力焉。生平足矣。鹽政諸書，面許賜抄，祈發一本，尙容續請。

與范景龍書

入京來千態萬狀何可言然亦何足言唯是刪零存整有可以報范陽之相問者一事曰袁印君細講職掌也九邊鹽法本司實掌之鹽法壞而邊餉空有味乎袁之扼腕也尋端緒於河決魚爛之餘運經畫於捉襟露肘之日真一片有心人何幸當吾世而不失無意相遭有奇盡吐弱骨增壯竅緊漸開異日或略有樹建是未可知也老先生無窮期許耿耿九原倘亦聞之而色笑耶茲以風便附寄數行鹽法諸書大費抄寫蕭經如暇暫爲借用鹽書抄畢卽令回矣

寄社中友

昨諸友遠來比時忙冗未獲從容伸敬且感且愧及馬首欲南生有區區未盡之言難於面告特以尺素布之萬惟虛受借光不淺蓋聚星一社頗爲人口膾炙卽生所藉諸友以重者寧直雕龍繡虎之辭章黃甲青雲之名位唯是言有壇宇行有坊表往常所與諸友反覆而談者期無相負區區癡心不自揣意謂凡我同盟言歸於好乃乍聞宋蔡二友酒後反面酒醒尋仇此不引咎彼不釋怨吁嗟有是事哉講學論道之朋作攘臂裂眦之狀壞自己之行止借他人之口實何不思之甚也過貴速更人宜自反防維維乘長此安窮二友於此宜各以夜氣破彊陽同盟於此宜共以旁觀正當局而生模範不端積誠未至及門且不見信對世祇有汗顏因舍弟之歸布腹心於執事縱不愛人亦當自愛最不可恣者濫觴之飲最不可逞者戲謔之言最不可訓者盛氣之相加最不可安者怙終之自誤倘有乘興鼓舌教唆挑激者尤當與衆共絕之亟當進苦口之藥勿復操入室之戈留此面孔好相見也生滿腔憤懣十不逢一念之念之

答周蓼洲書

客歲從徐春宇年兄聞兄近况曾寄候音今春乃于郭孝廉拜兄手教衷腸激烈如親聆警妙想前書此時已得則吾兩人作書時同也拚一死字愛一官字古今曲盡矣弟叨計部不自揣日求所謂九邊鹽法也者而講究之蓋國家邊餉取足于此袁印君深于其說條有成畫以弟爲可教傾囊授焉儻借此發明得爲國家效半臂力是所以報知己者特弟花樣不時未卜稅駕耳思兄之極則吟哦佳韻鄭重收藏遇雅客始出以觀之扇頭拙句非敢爭旗鼓聊寄遠思也

認真草卷七

粵東鹽法

國家餉邊取諸鹽利今太倉若掃矣時籌者仰屋而歎求共濟於同舟意至切也以粵東與兩淮相提而論產鹽行鹽地頗相如解京餉邊課甚懸絕據鹽法道僉事李棲鹽政考移文該司核不均之故意必極力查刷多方措處別有良籌以匡不逮乃來文洋洋纏繩幾千萬言或據開銷以公移或諉事權於他省自解則誠得矣共濟其謂何哉天下事非一家私議願虛心而酌之夫鹽考所載解京項下四萬三千九百二十九兩而今每歲解京僅二萬零來文謂鹽考原非常數三十九年引目多拆溢額三萬李僉事遂包此溢羨而言之以前以後俱無此數誠若此言是引之疏滯專聽於各商餉之盈縮特任其偶值也朝廷又何必設官何必懸法哉據李僉事十七禁十六議每以課餉之充自許爲稽考之效卽按院軍門亦批鹽餉溢額該道精核之功其非偶值明矣且未溢以前積習猶莫諫也旣溢以後勝著不可追乎使用法者不厭爲已陳之芻狗則溢餉者豈遂爲空谷之足音不此之究瑟瑟焉援前據後辯此年之非定數而條引考中自註之語以爲券恐非通論矣不甯惟是李僉事旣以解監之數與解司轉解京之數開列於前及其自爲酌定除恩詔蠲免外較數歲之中以九萬爲率六萬四千七百四十兩解監二萬五千二百六十兩解司且云時訛不必取盈時溢請詳另貯該司所得意爲有據之定案者此也抑知其爲當日

苦心之微詞乎。李僉事竭忠體國，固甘己身之怨勞，而留餘忌盡，不無難爲後繼之慮焉。此固易明也。且李僉事作考時，尙未知太倉懸磬，邊軍枵腹之極，故運機布算爲粵東計，未暇爲太倉計耳。使知國事至此，必更出確議，以佐公家，豈肯留此微詞，以滋藉口耶？故就李僉事已行之法，而實脩之歲，不難於溢三萬耶？更就李僉事未盡之意，而推廣之歲，又不止於溢三萬也。李僉事其顯者也，提舉吳邦楨不知其服官何狀，去官何因，獨念其復部文，以八議爲鹽政考，相發明焉，以羽輕之職，鄙肉食之謀，耳目旣眞，區畫可據，即用者或有限年之格，而用言者豈可以人廢乎？本部合併鹽考，而折衷之，將大措手於粵東矣。蓋粵東鹽不爲不多，地不爲不廣，豈其行引僅登六萬，特患有鹽而未必盡以引行，豈其餉邊儉於二萬，特患有餉而未必盡爲國用？即就來文所扼腕而談者，一則本宅之私票，聯檣揚帆，莫可誰何；一則貲郎之攫金，截多作少，掩有爲無，夫私販如此，官鹽安在？小吏如此，大吏安在？果稍一盤詰，必致反噬，必不爲王民，然後可果弄鬼搬神，莫能端倪，必不受統屬，然後可。天下甯有此世界？有此事體乎？故導利者鹽也，行鹽者法也。有法則客商不苦官爲虐，有法則客商不敢自爲奸，有法則鹽盡歸引餉，盡歸公源潔流清，奸人不敢侮而動，故欲求鹽利，唯議用法。十七禁、十六議，李僉事已試而效者，所當畫一守之，其未竟之緒，與吳提舉八議次第舉行，歲增課餉數十萬，不難也。吁嗟！邊疆多警，年例久虛，盱衡內地，水旱盜賊相尋而起，念則壞惟正之供，且多拖欠，嘆東省異常之變，敢問催科徘徊展轉，求所以補歲額而濟邊儲，唯是地不愛寶，天不能灾之鹽利，有可講者，而該司繁稱多說，極口苦辯，萬不肯佐太倉一籌，詳其大意，不

過恐爲粵東加餉耳甯思鑄山煮海原利國之資踐土食毛共急公之誼國之初盛軍興甚簡藏富於民後因多故稅餉淳加不獨一粵東也卽如兩淮初額不過數萬次第增加至六十萬遂以所加著爲定額今欲分毫減之豈可得乎粵東亦王土而獨以爲不可加何也且使加課而強以所不能則絕流之漁中智能辨今粵東自有大美特經理無人使利不歸上亦不歸下徒入奸人手爲可惜耳故等鹽也別省餉有定額粵東獨稱無定旣以無定者藏奸別省有定然淳加之餘又卽以多者爲定毫不可減粵東無定然溢額之時復援少者爲定毫不肯增是又以有定者背公亦不可解之極矣故本部今日爲粵東計兼爲太倉計不敢鑿空論事憑臆決機唯考規條于祖制按建白於前人反覆李僉事之考而參伍以吳提舉之議更定鹽法增加引餉與粵東曠然更始幸勿驚也議款十四大約就事勢所久偏枯者爲之調劑人情所久鬱塞者爲之疏導化私成公因利爲利補歲額而佐邊儲抑在斯乎

一曰行部引

鹽以引行國有定制粵東請引六年一次往牒可憑也今乃專奉軍門號票恬不爲怪其以爲非鹽政長法者僅吳提舉一人耳卽來文據萬曆二十一年陳軍門發票式憲牌謂其時與部引並行未嘗偏廢又稱三十年差官謂引侵費誤事續請未至權用號票此尤不可訓矣夫引不足則引可增引易盡則請可豫票非所以爲法而權非所以爲名也票引並行且不可矧專行乎就後先相委之詞按上下相蒙之故請引何遂至將脫絕之時遣官何偏逢不的當之手因差就錯卽權爲經粵東不利行引之意可得於言

外矣。夫行鹽以引，則權無二門。今公然用票，是以外臣而更祖制也。且權既倒持，則利必瓜分，棼然專擅。是又以旁落而開濫觴也。票之數果止如引數，而票之奉果盡出軍門耶？司農不得與其權，何所執以核其餉也？夫廢閣既有繇來，因循易於借口，以不能問不欲問之情，而遂成不可問無從問之勢。此國家何等時而利柄不收，容其旁落哉？亟宜遵照祖制，查通省應給引若干，今加引若干，先時請引，照引行鹽。一向號票悉爲停止，使祖制得復，稅餉有可憑而問焉。此粵東今日急務也。夫人情當其久據而偶收之，必有瞿然不自快者，然何敢以常情待當世之賢豪乎？

一曰嚴考成

鹽不行引，則私難究詰。引不考成，則官無激勸。粵東之視引若贅，其視行引若戲，無引固不以請引爲急也。即有引，何嘗以銷引爲重耶？拆引聽各商之多寡，遺引任各埠之停壓，汎汎悠悠，是何政體也？且每歲各場所產之鹽，政足供各處行鹽之地，而每歲應折之引，政足掣每歲當行之鹽，就鹽而取息，商之利也。而就引以責餉，則國之利也。今引無成考，則甲可以影乙，貓可以眠鼠，商且行不盡有引之鹽，而與官爲市，官且利不必盡行之引，而以國爲市矣。粵東之病，政在鹽多引少，奈何反有遺引耶？卽來文所稱南雄引歲約二萬道，三十三年縮至一萬二千道，或出該司當年官吏隱蔽爲奸，然已不可追詰。不知本部非諫既往也，以追將來耳。及今不蚤爲計，恐後之視今猶今之視昔矣。欲振積習，宜定成規，將發到引目，類至三年載入考成事例，通計引目無遺，課餉充足，卽將本司印官定爲上考，如有遺引缺餉，查照分數參

罰庶部引隨到隨發永無寢閣之弊而後來任事者益知勸勉矣故行部引卽當嚴考成同條而共貫者不然且與不行等耳

一曰重京解

宇內鹽司除邊中鹽糧外仍徵餉濟邊京師天下根本西北戰士荷戈計臣握算卽東西南北總爲一體而獨重者自有在焉故解京歲額或有不足聞有搜索別貯以補京解者未有顛倒重輕反以京解成借支如粵東者也鹽考所載解京解監與存留京餉旣各有名項而來文十年開解之數解監定數歲必取足解京則多寡任之耳何輕至此也且三十九年以前解京者開稱儘數三十九年溢餉三萬又以所溢者湊支兵食而還倣未溢以前之數解京三年之間少解四萬又何輕至此也且所稱存留充餉諸項每不完解而挪借解京者以爲補湊卽來文亦自謂廣濟橋解司額項每年四千而七年以來解不及半且并該府額編兵餉共逋至七萬有奇夫寬其存留之逋補以解京之項又何輕至此也粵東故事大概以京解爲迂緩不切之事相沿既久牢不可破夫使太倉猶二十年前之太倉或可姑置嶺徼之利於度外今太倉匱乏不敵一富人之屋尙可任其輕忽而不之間耶故今日之事反其輕者而使之重則解京之額甯議增毋議減卽地方有難已之費亦當別求措處斷不可移京項以填逋案也破積習而重本計請自今始矣

查會計錄隆慶二年御史王同道題該省用兵乞將應解戶部鹽課引紙等錢共七萬三千四十九兩留

爲征調官兵糧食之用。尙書馬森覆疏已稱該省鹽課引目四五年間並不差官赴南京戶部補刷。宜就彼清理官引鹽引設法疏通。至於橋稅尤嚴加察。稅必歸公。則軍餉可充。以後應解錢糧再不得援例請留以誤邊餉。是言也。固行部引之明條而尤重京解之公案也。

一曰設運司

浙、福、山東等省餉數不加於粵東。皆設鹽運使司。而粵東止設提舉。復革其在海北者所管鹽場。改歸府佐。卽見存提舉徵收課銀。止東莞、歸德、靖康、香山四場。而餘不與焉。及課缺解遲。部文查催。又咎在廣東提舉。天下甯有事權未付。而責望可行者耶。今之提舉。祇各府道之牛馬走耳。無論難於分外。望其有借箸之功。亦不敢於分中。保其有掣瓶之守。勢使然也。故欲重彈壓。須隆體統。粵東長計。亟宜改提舉爲運司。更定官僚。以理鹽政。再設運副分司。北海、又虎頭門暨潮州俱屬要地。各設通判。以專盤驗。如鹽盤至所管河下。兌商截角引目。俱仍赴運司投銷。其首領經歷知事。緝巡省城河下私鹽。並烙船秤務。差委其各府州縣場竈。每年額編課銀。及水客軍餉餘鹽銀兩。盡付運司投納。轉行解部外。移文申報兩院。並布政司鹽法道。查考其各場。每年有無拖欠數目。歲終亦要揭報運司。以憑查參施行。則禮貌崇而事權重。責成可以展布。綜理易於精嚴。鹽政更新。國計其有賴乎。至於衙門人役。廣東見在者可以頂充。海北舊有者。可以重補。斟酌變通。存乎人耳。卽添設運判二員。經歷一員。均於鹽政有裨。建造衙門。募充人役。或取諸鹽司之積羨。或派諸通省之田糧。費少而益多。亮智者所無難也。所患者。局面驟更。事權頓異。舉布

政司所獨擅者而一旦釋之儻非奉公之純臣必起阻撓之異議然共圖國事敢問私情是所望於同志爾

一曰更任職

運司旣設則任職可議矣蓋鹽實利藪而國用藉之其所係何重而可輕付人手耶利能昏智脫之實難財不苟得談何容易非得天下名流而任之孰能絕飲盜泉垂芳清白爲國家裕度支者粵東之以提舉治也正以課希其以貲郎鬻也明以利市夫旣朝市官矣而欲官勿市商且以限年之格窮之借令卜式輸邊僅博一長沙太傅名無復之轉而逐利人情乎曾提舉有激乎其言之李僉事亟取其說謂賢利久任庶其少瘳而以例從中制機慮旁撓付之浩嘆也吁嗟鹽何等事治鹽何等官而任用若此我不敢以刮目待彼只得以不肖應狼藉彰聞祇供點幽者填案之數國家能受其弊乎夫各路鈔關稅能幾何猶必董以部屬獨於鹽場付之銅臭卽各運司間用正途率旣破之餕耳其得失之數于貲郎相去能以寸哉故爲今之計亟宜委任賢科尤必推擇民譽予以得爲之權待以不次之賞使耳目改觀心志異向曩所鄙以爲穢途者一旦而變爲要地則宇內利權盡歸公帑又何憂邊餉哉然此甯獨爲粵東言也

一曰復淮課

江右三府改食廣鹽當認淮課此事理之明白直截不費解說者也而徒懸談柄久未堅決一行查催便相推諉如來文所云私鹽透漏橫作阻撓淮賈覬覦陰行擾奪是徒以隔省爲脫卸之門竟使盈廷成道

旁之室然無足怪也蓋行鹽以法行法以權粵東鹽司官止於提舉彼上不能自通於本部下不能自列於諸司省以內且不敢概問何論隔省哉積輕勢使然也今既議設運司矣職掌所轄通行遠近江西三府總歸掌握其相臨有體其自運有權申明前議加廣引抵淮課固不求多於淮之舊額亦不容仍夫廣之漏卮參伍而行畫一而守敢不奉法者以三尺從事則數年之策決於一時而數萬之餉增於今日矣

一曰通海北

粵東提舉司有二一在廣州屬十二場一在海北屬十四場廣州屬場除每年輸課外仍通商場本省江楚地方共一十八府州縣引行六萬餉踰七萬各處抽收不下數萬湖商橋餉復二萬四千有奇獨海北一十四場止辦歲課四千五百零而已高雷瓊十場自煎自賣無客商餉是可怪也廉州四場雖聽客商行鹽然又與省城不同爲客爲商總是一人票各以二百五十爲率餉共祇三百七十有零還貯該府備給兵食是又可笑也夫商引既不通行場課又復無幾提舉遂爲冗員裁之誠是也甯知天下之患莫大乎不均求均之法莫大乎補偏偏之不補而更議裁不均者豈不益重其不均乎引不行則商不通商不通則鹽不能貴賣而竈戶因以日困國課因以日謫故致有斗米易鹽可五六斗者且有終歲停積視之若棄者此吳提舉之所爲扼腕也夫鹽固利資也有以通之居行雙得其益無以通之上下兩受其傷矧官不通方而民或躍治徒使天下之大美無聊而歸於私竇國家不收毫忽之用亦不可解之極矣卽瓊懸海外似難通商而幅輁遼闊生齒繁多又私販通黎取利較重本地豈無商販可通乎高廉二郡陸抵

西粵水達閩海無論私鹽弊竇多難枚舉卽今四路商販歲不乏人如高鹽過化州梅祿廉鹽過陸川博白俱有私稅此猶歷歷在人耳目者也雷州雖稱瘠薄之區人民稠疊商客往來遂溪所屬二場府州縣分并市鎮地方何難立埠行引耶合無查照廣州府屬事例於四府各州縣立埠召商給引行鹽瓊可二萬道高一萬道廉六千道雷四千道每歲每埠輸納正餉引目紙價若干兩預赴該府管糧官或海防官秤納方許買鹽酌價拆賣其餘肩挑小販如今日私鹽積弊盡行禁革不許賈賣以妨官鹽如此行之竈民得資通商之利以供國課太倉又藉通商之利以濟邊儲一舉兩得何憚不爲也夫海北額課不過數千提舉之設意或有爲自經裁革屬之府佐視事者喜於因循諉於疲敝孰肯爲太倉計乎來文所謂高雷廉瓊地僻民稀亦未之深察耳

一曰增埠引

粵東本公司所轄鹽埠五十有六各商例應預餉上下挨次頂替今據吳提舉所稱爭承之狀可掬也告承至五七年或十數年久踞而不忍舍甚至前承者未及居期而後承者復行告奪夫商惟利是視者也使其無利卽強之而不肯赴使其有利而無餘卽赴焉而未必爭惟是行鹽各埠地方多有富實戶口每有蕃盛各商唾手銷鹽之易遂拊心得引之難此據彼奪固其所也吳提舉謂大都以引有限而利無窮非破的之論耶夫爭固非下所宜有也而善經國者政欲得人情所共爭之處而操其用故法不勞而令易行賦驟加而人反喜爲今日計與其以可居之貨分厭商心而不足毋甯以可增之引合裨國計而有餘

情狀既不難知，規條可以義起。合無每年每埠除照原給引目外，倍爲增添餉解部。其有地廣人稠，堪以增埠，并散拆引目去處，不妨商人告加此酌地之利，順人之情，因其勢而利導之。其於太倉豈爲小補耶？

一曰絕西運

查鹽政考，東粵左襟汀、漳，右控梧、桂，負荆楚而面溟渤。鹽四通其間，潮有隆井、招收、小江，惠有淡水、石橋之饒。其鹽爲青生，潮商繇廣濟橋散入三河，轉達閩之汀州，爲東界。水商運惠潮之鹽，貿於廣州，聽商轉賣。一自南雄度嶺，至南贛，以達於吉安，爲北界。一自梧入桂，至全州，以達衡、永，爲西界。而遞轉於北，一自韶州至樂昌平石村，徑達於楚之郴州、宜章。一自連州至星子白牛橋，徑達於衡之藍山、臨武，爲北界。而迤延於西，向來通行無礙。自官運興，於是西省專衡、永之利，而禁韶鹽不得踰平石，連鹽不得踰白牛。東人虧餉，楚人艱食。於是衡州之民思復連韶之引額，便於楚，並便於粵。此斷宜通也。李僉事之議曰：衡居楚東徼，與粵爲隣，隔連韶僅數十里，其去西省殆千里而遙。買食西鹽，每斤價至四分，固出告者之口。第稽之粵西鹽政考，亦有謂衡、永鹽每斤動至價銀三分內外者。其說不誣。而西文所稱不過七八釐，與連韶相等，殆不其然也。西貴東平，似無庸問。貴而不致罷市，亦未足問。惟是官運派於衡者一萬八千三百七包，商鹽配搭如數。即使盡以食衡，郴十五州縣戶口計且未給，矧歷全灌、永、寶、擴，賣過半，如疏中所云，其能濟乎？誠計及於民之艱食，則東引當復也。引復而或妨於西運，亦未易言。查每運該鹽七萬二千餘

包分爲三起完於周歲。壟斷貪夫習爲奸利。剏大其船可容七八百包。止派官鹽二百五六十六包。每起百船或百十餘船啓行之日。莫不滿載。其所夾帶如三十七運頭起九院近日題將運船改小。意正在此。倘禁絕私販而以衡額攤於全灌永寶。尙未敷也。何地僻民稀之足慮。卽以餉利計。衡之一股合官商兩項錙銖而算。自東至西。約一萬三千餘兩。顧納於西省梧平桂三府者。止該萬餘兩。此在西粵鹽政抄班班可考。若復衡引六千道納充西餉七千二百兩。較數僅少二千有奇。第運額仍舊而歲餉加增。是西人拱手而受七千金之贏也。况官運鹽利數約二萬。跋望於兩歲之間而不足。衡民認餉不下七千額。坐於一年之內而有餘。爲粵西計者何靳而不爲。仍議令諸商先期納餉。必完於上年冬始准拆下年之引。計此引衡人求之數十年而後得。必無不繼之餉。省議部覆。又非無名之供。而西文乃曰恐資笑柄。慮益過矣。然而是非李僉事之言。萬曆八年督臣劉堯誨請開復韶連二路。已先言之矣。堯誨之疏具在。議韶每年拆引七千。連每年折引八千。其西省官運商引並聽通行。及奉旨下部資行兩省覆議。堯誨復有請罷官運。仍舊歸商之議。卽訟聚盈廷議成中止。而鑿鑿碩畫迄今論鹽政者。猶亟採焉。蓋國家二百年來凡事干軍國。如鹽屯茶馬之政。舉勒爲畫一。故法例得以通行於邊腹。而凡小大之臣。及軍民商賈皆有所持循。以奉國亦旣久且便矣。奈何廣西一路行鹽獨爲一法。而使律例不能通行也。以爲有利耶。巡撫殷正茂初議官運每年定爲三運。每運該鹽二千五百引。每引該鹽一千七百五十斤。計三運除原本本餉價及人船轉輸之費外。每運實取息一萬四千三百七十八兩。每年則該利銀四萬三千一百二十四兩。即使鹽

壅賤售亦不下二萬五千餘兩富矣或行之十年計該三十運而獲利該四十三萬一千三百金也乃廣西八寨舉事彼時總計司庫鹽利止五萬餘金至於減去梧鎮軍門額餉及廣東提舉司引價十年之間何啻十一二萬金而猶以爲有利耶蓋原議每年三運今縮至一運在廣西則明減去鹽五千引在廣東則革連州額鹽五千餘引韶州四千餘引每引納正餉銀九錢引價銀一錢其餘各處納堂牙利船頭等項共計之不下銀二三分凡此皆以官運而後失之也然此特以失利言之也至於所謂運數短縮者豈真每歲不能三運將使前人過算耶三運之實鹽其並之一運者數或不盡減但不得盡爲官鹽而止以一運償息耳所以然者官運之法惟計運以責息納餉之例乃照引而徵錢故使一年而三運則當償三運之息而納三運之引餉使一年而一運則亦止償一運之息而納一運之引餉耳是以官運日縮餉額日虧徒侵商利而無益於公儲也豈非立法者有以使之然耶或以爲梧州旣設官開廠以司掣驗又安得私鹽如此甚行耶而不知自有官運以來其抽盤掣擊之法所得行者惟左右兩江商鹽耳若官鹽安敢行法蓋其所運者軍門餉鹽也出納屬之藩司領運專於提舉而委官掣驗不過梧州一府佐固屬官之微者每聞官鹽船至則謹守橋關以防他盜使盤博完善船行不留則欣然而喜又安敢問其船之輕重耶故大明律有監臨勢要不許中鹽買引以侵奪民利之條豈非預有見於此至於條例所禁內外勢要官豪開名古窩轉賣取利與夫巡捕官乘機興販私鹽至二千斤以上俱問發者此法皆不得行於廣西矣然使其興販出自二提舉與押運通判猶可言也萬一司府官竊有所與聞而於國體得無少損耶

今爲廣西計者以爲一旦無鹽利古田必不可保廣西必復亂此亦危言以恐動當事者而成其私也前者田州岑猛之亂與夫斷藤峽之役其聲勢十倍古田及其既平也則散軍罷餉未聞別生財利以爲兵端者乃今於古田而過計如此耶大率論天下事當以天下之見論之兩廣自藩省言則有東西之分其實皆吾土也公帑之積皆吾財也廣西司庫向無厚儲每一舉事俱仰給於東人卽今梧鎮歲發銀七萬五千餘兩以餉西師分毫皆廣東民力也使官運果利而鹽之產於廣東者亦當使廣東在官行之於以寬息東人可也廣西旣坐食其常供矣安得又專利以妨其正課耶况梧鎮歲入額餉十一萬金皆爲廣西計其貯之梧州者與貯之桂林一耳故使梧鎮之額餉有餘而廣西誰與不足耶且今古田旣平止添募土兵四百名歲餉不過三四千金梧鎮軍門以廣西旣通官鹽每歲該發桂林餉銀一萬六千七百餘兩於中損其六千七百兩而計廣西一運所獲之利亦略相當雖有贏餘實難久積繇此言之則廣西之官鹽將無濟於善後即使罷官鹽而復商運未必其後卽因之不善也在昔宏治正德間廣西靖江王府以該府戶口食鹽每歲差官校往廣東收買因而挾帶私鹽獲利該原任廣東布政尙書吳廷舉建言以爲王府運鹽非法檢會大明律例比議題革至隆慶末年因廣西議行官鹽該府長史司亦求復自運彼時兩廣軍門再申前例而駁止之是也第於所謂監臨勢要官豪者恐不專言各王府也况食租衣稅之吏而使之坐市列肆販物求利豈所以爲名耶此廣西鹽課當從舊法商運爲便誠哉乎國家公平久大之道所以示人垂訓者不但有關於鹽課耳是議也人方拭目以待新猷復因煩言終於報罷自十

一年而後因陋承訛孰發大難之端者詎意吳提舉有概於中訟言西運之當絕也夫李僉事議復衡引六千與官運並行猶不能屈讒慝而間其口矧欲盡絕西運以復舊法不幾於移江河而行之山乎竊聞西省所利不獨爲餉豪商奸吏乘而窟穴其間遂致牢不可拔巡按王以甯之拊心太息以爲不敢深言也天下事乃至此耶夫楚民卽粵民西餉卽東餉自可直以有餘於東者補西之不足何必曲以少補於西者貽東之大傷西運不絕東事終不可爲也亟宜每歲在於本司議徵餉銀協解西粵以抵西運鹽利二萬之數內除水脚引紙牙稅滴珠包藤等費每年實徵解銀一萬五千兩協濟西粵兵餉請乞題准仍移文西省將木馬船隻并差官解運一概停止彼省戶口食鹽悉聽商人承引買鹽至彼發賣以達楚之永寶等處則每歲溢出引餉何啻數萬耶在西省不費不勞拱手享自然之利在東省引增餉益大裨邊儲而郴衡居民又何至間關萬里以艱食叩九閻也計莫便此圖之宜蚤爾

一曰均菜餉

廣濟橋以上路通長樂興甯程鄉等縣及福汀等處名曰橋鹽餉銀二萬一千四百九兩五錢六分自橋以下路通海陽潮陽揭陽饒平普甯澄海惠來七縣另立經紀行鹽名曰菜鹽縣有定餉鹽無定數銀二千九十八兩李僉事查訪利弊據海揭二縣會議稱商鹽論斤配餉菜鹽論縣配餉商鹽每萬斤餉銀六兩六錢五分菜鹽每萬斤餉銀未及二錢貴賤懸殊私販難禦管橋官亦稱海陽縣城內則爲菜鹽城外則爲商鹽橋下則爲菜鹽橋上則爲商鹽咫尺之間鹽價迥異縱斧鉞在前難免侵越而揭陽縣河婆湯

坑路通程鄉長樂雖募兵把守日計私鹽數萬故嘗按鹽政考而嘆不均之課有同世而天淵者粵東與兩淮也有同省而天淵者廣東與海北也有同地而天淵者橋鹽與菜鹽也不均之形有目共見而遞相坐視不一措手徒鰐鰐焉憂私販之難禦何也鹽之大患莫過於私而今迫以不得不私之勢授以必不可禁之形使狼戾之鹽徒入奸橐而國與商兩受其困猶謂國有人乎合無如李僉事之議革去七縣經紀歸併橋商認餉行鹽照埠給引橋上橋下俱爲一體論斤論餉不使異同則增餉何難鉅萬而私販不革自無矣

一曰索積貯

部文索司積貯該司謂各項俱無餘賸可以那解獨稱連州稅餉有五千餘兩西運扣納引牙等銀賸可六百餘兩是足爲太倉一助然不特此也鹽政考所載李僉事三十九年另貯溢餉二萬一千一百零四兩七錢一釐七毫在布政司庫中尙未動支又查變賣沒官價贖共一千七百八十八兩五錢三分四釐二毫其餘各府繳到循環共銀三百七兩六錢五分四釐二毫乃係本道議詳奉行積出之數此外多方搜查如往場商人投縣盤割追納價餉共銀八百二十五兩九錢五分九釐一毫又水客商人告爭秤頭加斤補餉銀二百三十三兩二錢零一釐二毫又海晏竈民告復原餉每年三十六兩總而合之五項共該得銀三千一百六十五兩三錢四分八釐七毫各衙門盡數支出解司類貯預備兵需又以各項日計不足歲計有餘自後仍當二季一次查解有味乎李僉事之言曰民間之懸磬已難誅求而官帑之漏卮

茫無查刷。其著爲成說。以杜隱沒也。夫當利之散漫。固在有心計者。嚴清理而立之防。及利之歸公。尤在識時務者。酌緩急而善其用。按各項積貯。原備兵需。而今日兵需。有急于西北者乎。在粵東。尙爲備用。在西北。則爲急缺。矧東省變異。歲失額二百餘萬矣。枵腹莫應。脫巾屢聞。持籌之吏。勢急情迫。亦旣大聲而疾呼。率土之臣。毀私紓公。無不首擊而尾應。粵東獨佯若不聞也者。彼其食之能下咽乎。合無悉前各項。盡數解京。以濟急用。夫事有緩急。識時務者俊傑也。亮不執一隅之見。復爲留難矣。

一曰禁私鹽

鹽法之弊。私鹽爲甚。申令至嚴。犯者接踵。蓋邇來盤詰水付。哨船陸付營堡。豈有此輩不愛錢神。而恤國計者耶。且論事必要其本去。弊務清其源。鹽必有私賣。而後有私買。今盤驗既視爲故事。卽盤出又不問從來。買者薄科。而賣者漏網。亦何憚而不習爲奸弊乎。欲舉積弊而掃之。宜重嚴盤之任。而行連坐之法。於虎頭門、潮州府各設運判鹽船。到彼預令單開鹽數。投遞隨照單嚴盤。絲毫夾帶必寘諸法。其在各商告引往場。令場官查照奉到引票。登記月日姓名。包斤號船數目。在簿驗明。截角放行。月終開寫結狀。并有無私賣鹽斤。赴附近該管衙門投遞。其經過巡司哨堡。亦行嚴盤。月終結報。曾否盤獲私鹽。以便查考。其有捉獲私鹽到司。除量行充賞外。餘俱沒官。變價充餉。而追論竈戶之私賣。客商之私買。場官之冒結。以前越過巡哨之賣放。一體按法重懲示警。卽有神奸。豈能飛度耶。蓋李僉事之禁私鹽。原有追論連坐之法。私賣塞而公餉溢。誠得要領。吳提舉復申其說。其可恃明矣。

一曰烙魚船

粵東魚船名曰蛋戶裝送盜賊拐帶又藉口買鹽醃魚多方夾帶吳提舉謂其爲害不小且礙官鹽是安可不問耶合無行文各府州縣責令魚船兩旁印烙火刻姓名居往妻男號艙仍每年查給號牌出海照證如遇買鹽先請印票一如客商告引內載買鹽若干應納餉若干訖方許到場照票買鹽不許多載經過巡哨一體嚴盤回至原給印票衙門依期投銷則蛋戶不能爲奸而官鹽無所妨害矣

二曰正鹽斤

粵東正鹽每包一百二十五斤惟連、雄、韶三河生鹽一百三十八斤復以藤包走滷各廠抽割諒加二斤半亦云多矣復因生鹽水客告比三河熟鹽水客亦照此數而梧商生熟鹽及英翁浛光等八埠紛紛比例俱一百三十八斤非例外深仁哉何雄、連、韶、梧富賀商人復以途長稅疊懇求加秤頭十二斤而生鹽水客援例告加遂俱一百五十斤矣總計百包加去一萬六千八百斤少納正餉六兩零况又有暗加鹽斤明取秤頭不下二五六斤計此每年客商共少餉萬有餘兩誰謂秤頭爲無幾也前道意切惠商不忍其呶呶之求而聊爲涓涓之與然涓涓不已遂成江河所關非細矣客商之執以爲辭者途長稅疊耳夫天下之物近者賤遠者貴物之情也行鹽愈遠取價愈多自足償費何待告加吳提舉謂小人無厭欲恣谿壑陰蠹引餉爲國漏卮旨哉言乎夫養驕子者因噎輒予既予轉嗜楚之則止今鹽斤非故有加無已卽罄山海之藏難罄臘蜀之望亟宜查照舊例革去秤頭一百三十八斤之外不許濫索則省一斤足

充一斤官餉之用。撮壞成山。導涓宗海。持籌者之所不遺也。

大約天下財力有不足之處必有有餘之處。此造化自然之數。從來經國者每于財殲兵敵之餘。略施幹理。轉爲富強。政以有餘之處自在特俟人措手耳。今粵東去天萬里。法紀疎闊。利權以互爲假借而成下移。物力以失所節宜而成坐困。因此從前因循之過。或亦天留有餘以待今日乎。近聞該省諸臣亦有加引行鹽之意。第天下事有病在節目者。利用修葺。有病在要領者。利用改創。粵東鹽利散漫極矣。非舉而大創之。卽稍稍加增。何益於緩急之數哉。本部列款十四。審勢度機。增引加餉。收其散漫者。以歸公家。歲可得京解三十萬。蓋於不調之瑟議更張。非以無米之粥難巧婦也。所深幸者。地方諸臣意氣方新。規模自遠。念國事之已急。而義切奉公。豈其在兩淮諸運司後耶。中外之心力能齊。則粵東之乾坤另闢。蓋物極必返。數窮則通。及今共建大策。以濟邊儲。使造化有餘之處歸於有用。此千載一時也。想同志者投袂而起。不待其詞之畢矣。

福建鹽法

閩中鹽利。前按臣徐鑒有題。本部有覆。諸商之告急者接踵。鹽司之持論者甚長。一經查催。動踰歲月。所稱增引增課者。祇騰轉靡定之文。衍遷不了之局而已。國家何自得絲粟之益哉。夫共爲臣子分宜急公。且值時艱。誼期共濟。輸攻而墨守。非所以協恭也。暮四而朝三。尤非所以報主也。今反覆撫按代題之疏。而平心論之。苟六幫之期密。而或滋紛擾。原可以六幫匀入五幫。苟依山之引開。而無妨正課。自可

以依山明稱附海本部豈有苦爲堅持故相違拗之理耶卽所稱行鹽之地原狹歲入之數無定欲以新增課銀一萬四百八十四兩六錢三分零每年先截出五千二百兩併入舊額解數共銀二萬七千四百兩仍分上下兩運依限起解其半尙有餘銀合候追完留貯司庫俟新引銷盡結算多寡盡行類解夫是役也按區處之有方知情形之不諉安見本部之不從而煩稱極指排部議之爲過求則誤矣復於有言不盡之中併徐御史原題而有飲恨之意又誤矣夫時事深可攢眉救濟不容歇手得寸則寸得尺則尺本部於該省乃嘉其可與言而細爲之商且因以風厲各省使共著急公之誼非曰因該省自欲增引反爲無已之求也使自增者遂致過求則自匿者反爲得計毋論非本部所以自處亦豈所以示人哉總之天下惟實心可以濟事惟公論可以服人如不深究國事之何如而各愛其情誰則無口蓋興潭泉不食官鹽地誠狹矣然採諸輿論詢諸土人僉云舊額三年開中之引止足供年半之用卽增官引亦不待三府而後辦也又謂徐御史議年增七千亦未然之限數非已試之成規是原題徒夢說矣該司祇因部有四千之加遂激爲減半之請使其時部不議加止以原題從事奉行否邪至於謂行鹽地狹商竈告困徐御史忽有添引增課之請蓋意在減幫以通商因借增課以裕國夫鹽以引行者也課隨引增者也引誠足用何爲議增商樂增引何難於課如徐御史意主惠商固當直請減幫何苦更稱增課反而求之可得吾心矣雖然此不足深論也當太倉如洗之時有稍肯自獻其情略可補助於國如行廣漠絕人之城見似人者而喜矣豈於真人而忍爲督過乎故本部今日急求同志共濟艱難豈向同舟自爲矛盾該司勻

幫開引及歲解之數既經撫按代題合無盡如所擬庶局得早結課不久懸惟是調劑其中行之無弊則更有可言者在焉一曰小票當永革也蓋行鹽以引祖制也易而用票權以佐一時乏引之急實以滋無窮濫觴之弊該司謂抵票原不納銀引到照數扣鑿票卽停止誠若是則無弊矣何諸商衆口一詞不曰致用小票私販橫行則曰私販小票交插如雲豈小票之與私販相因而起有悔而動耶卽按臣李凌雲之疏亦曰抵票之設弊竇實多自具題以來臣衙門已不發一票其語可味也大約作法於公其弊猶私作法於私弊將何極代引以票可作法耶故閩中業已增引票卽永革爾一曰私鹽當嚴禁也夫行鹽者幫也而買鹽者各縣之水客也如客之期不爽則幫之行自速人情趨利如驚抑豈有好自爽其期者探本遡原私鹽實爲之祟耳故銷鹽苟易於流水買鹽何難於集雲私販不敢駕一而行三官鹽立見六通而四開乃今各縣只聽民便多食私鹽幫期遲滯悉繇於此該省疏中亦扼腕談之夫明知其弊而徒付浩歎怯於塞私竇而勇於減度支爲人臣子當如是耶考成之法具在嚴而行之銷引不及數者照例參處私鹽自杜又何憂幫期哉一曰多裝宜嚴禁也閩中鹽包二百一十斤爲一包豈非定之於官者耶奈何明爲定而不堅爲持裝包大小總聽各商之手守法者或如其常枉法者遂倍其半夫多而有利誰不願多且多而無罪誰甘其寡包旣踰額鹽自難銷鹽之路漸壅買鹽之心頓冷誰謂鹽包可不問也今須嚴禁鹽包更易鹽桶定以二百一十斤裝爲一桶多裝者以私鹽論則鹽盡歸公幫無不利矣一曰引目宜速刷也商人辦課領引下場全賴夏秋二季風順可乘延至朔風鹽重船傷且有性命之憂甯直資

本之慮乎夫總此引目也猶之與人也以無謂之遲回貽莫控之愁苦是何說也善理財者方參先後之著而妙緩急之用今乃悠悠忽忽爲此徒損於商無益於國之事誰司鹽政而事至此乎自今每年應給引目移文速刷使衆商不憂失時自不憂喪本在當事者一加意耳一曰請乞當嚴禁也招商中引國有成規從未聞引而繇於請乞者八閩何事乞引成風鄉紳舉貢投柬請乞不下百餘家相沿不美之俗共掣鹽官之肘彼劫於積威者斷不肯以金穴爲瓦注何難以官引作人情或送三十五道或送一二百道既以弭謗復借市恩不知引必四百道方成一封今有力者抵掌瓜分各深藏而坐待高價收鹽者沿門懇買必經月而始集一封毋論需彌急而售彌緩備嘗揩勒之難更且引雖集而時已後無奈風濤之阻司催應幫商遭嚴比不平之鳴所自來矣亟宜復招商之制絕請乞之門使商承領全封趁使下場誠今之急務也一曰土商當急恤也蓋鹽爲官鹽引爲部引課爲國課商爲祖商繇來非一日矣據商人張天福等所稱異地猾商窺知多利獵入占引官鹽爲名實借私販輕價厚售以致祖商凋零是可不爲處乎目今新增三萬餘引固欲以通商之計爲裕國之猷但欲使朝廷有實利必使凡鹽皆官引欲官引盡通行必使土商皆復業如不聲明飭法眼前新增之引復歸猾商兜占勒價揩賣指名引多故遲國課以圖將來復行減罷是可恨也更可慮也亟宜令在案祖商坐名認引給文赴南京刷引每名認實四百八十九道領回本省納價辦課則奸豪無竊入之門而國課有實收之益蓋爲國非爲商也此六者皆八閩之對症鹽法之須知而猶有事關大端舉世迷焉不以爲非其實不通之極萬難容忍者則興漳泉之不食官

鹽也。夫三府不食官鹽，在土之人，蓋云鹽其土產耳。守土之臣，蓋云事從民便耳。然利權非散主之物，則凡鹽皆屬官利，不問其土之產不產也。引餉原養兵之資，則凡民皆食官鹽，甯問其利之便不便乎？查大明會典，三府皆行鹽地方也。宏治十四年，令福建鹽場商人中到引鹽，以十分爲率，五分派與福興、漳泉四府一州，五分派與延建邵汀四府各地方行賣。萬曆三年，設運判一員駐劄黃崎分司，將黃崎分司運副移駐水口，運同移駐泉州，專督理漳泉二府鹽務。令典昭然，不揭諸日月乎？再按外臣次第建白成案可考者，則該省官鹽之議開議通非止一番。祖制之若明若晦，非止一日矣。先年官鹽止西路水口一港，至嘉靖十四年，運使婁志德議呈白御史題准，開設東路黃崎鎮港官鹽。嘉靖二十六年，又運使姜恩議詳通行南港官鹽。萬曆三年，又奉勘合開設東路分司，通行泉州、漳、興化三府官鹽。合觀前後事體遞變，大要以祖宗之制既因傳之久而漸湮者，又因湮之久而漸開。特事有彼通而此格，議有將行而中止爾。總之，卽所開之名爲官鹽，則未開之爲私可知也。東南二港可繼西路而開，則興化泉州之當一併通行，又可知也。奈何令典明懸，而竟同畫餅條議，屢及而終置覆瓿。曩猶間聞通行之議，以爲空谷之音。至今則積漸久矣，耳目恬然，不知世間有官鹽事矣。不食者晏然無不安之心，持論者公然無負愧之色。極重之勢，旣成難返，則大難之端，其誰敢發耶？夫論天下事，當以天下之見論之。天下大勢，如人周身，一處不通，全體受病。字內有司雖各爲分理，而所治者皆朝廷之事也。所供者皆朝廷之用也。不偏據其肥瘠，乃共湊於富強。故祖宗之制，彼此通融，遠近輻輳，九邊者不皆近邊之氓，食官鹽者不必無鹽之地，天下一家。

計當如是爾何爲臣子者之未解也凡起制科孰無遠志不患不軫念民瘼特患不通達國體邇來附近鹽場州縣每以便民動請包課總之不達國體所致然不銷引而包課猶有不安之意焉豈如興化漳泉寸課未輸徑以不食官鹽正告天下也故本部今日從旁觀以論當局據國體以衡時弊不食官鹽四字誠不欲聞三府再出此語誠不忍見三府終被此名也此地方諸臣之所當亟宜遵照祖制復行鹽之典以濟軍國之急者也要而論之天下事治於有法而天下法壞於有私私之爲物其竇多其味羶其勢悍在天下無處不受其破敗而鹽司爲甚蓋利之藪則弊之叢也在鹽司無處不受其破敗而閩中又爲甚蓋去天遠則法紀疎也本部所陳蘇前六款陰以私而屬鑒於陋習之中蘇後一款明以私而橫軼於令典之外此卽國處豐盈且不可訓矧太倉懸磬邊土脫巾持籌者以大聲疾呼之情望被髮纓冠之誼該省亦同室也而能晏然乎夫法固壞於私而治私還以法法非爲一方設是通天下計之者也法又非自今日設是蘇祖宗制之者也地方諸臣於鹽之一事經緯曲折總歸諸法痛懲積習與八閩更始則新增之引更難敷待引之鹽而散漫之鹽盡收爲公家之用又何必鰥鷗焉憂新課之不易辦而使原題成半解復以結算待三年也

認真草卷八

讀禮草

孝友堂讌語

孝友堂者吾友孫君兄弟之所構以觴客客就諸大夫表闔之文而名之也堂歲集勝友不啻如雲戊午仲冬之集則長君崇我之立嗣也昆玉四人長崇我次相我次鍾元次思皇今嗣崇我者鍾元子幼子望雅也崇我未嗣諸弟欲推以嗣之者心所同也而獨取鍾元幼子者以鍾元方歌鼓盆幼子失恃而徐嫂願爲之母也長兄長嫂春秋方盛不難於嗣而汲汲此舉者則猶子卽吾兒之愛可知也徐嫂卽旦暮生子而後日不減今日之愛又可知也是舉也幼子失母而得母崇我乏嗣而得嗣鍾元得獨遂其嗣兄之心而相我思皇於兄若弟若姪三處繫情一朝釋之所稱一事而衆美具也吾輩忝列親知誼均休戚聞茲盛事攜酒登堂不醉不止非盡關主人能醉客也是堂不敵富室之一廈而游於斯者若宇宙讓寬也所陳不敵富室之半餐而醉於斯者若宇宙讓豐也則孝友二字動物於無言客且誤以爲自能求醉不關主人也余嘗盱衡世故而以不解飲之人亦不能不醉於君家者蓋比肩接踵得一士猶且難之而一堂之爲士者乃四也墓側六載草木盡枯四君所同也書劍飄零壯顏相對四君所同也鍾元君苦節凌霜昆仲嘉與共爲固窮則弟有志而兄所成也卽今之立嗣兄爲弟耶弟爲兄耶總之互相爲而非各自

爲也。天下事相爲則治。自爲則亂。而相爲自爲。莫不始於家庭。所謂孝弟爲仁之本也。故四君懿美。未易更僕。就事論事。卽立嗣一端。亦見全體。而吾輩不能不以是日盡醉於斯堂也。衆賓皆醉。掀髯大噱。曰孝友堂可爲醉心亭。所謂醉翁之意不在酒也。因彷醉翁亭押體口占爲文者。太僕楊君也。援筆受辭。略爲詮次者。確確居士也。

賀李母鄭太孺人七十七壽序

嘗讀魯論父母之年。紫陽註以愛日。然年實人子所深願而不可必得者。則奈之何。有道於此。不盡以不可必者聽之。天就庭除。日用中子。于徐徐不大聲色。自足默增海屋之籌。其說在詩咏合妻子。翕兄弟。而孔子繫以父母順也。人之延年。憑此榮衛。而心實管之。世未有攢愁織苦之衷腸。而能加餐無恙者。順之一言富哉。此愛日肯綮。人子所須知也。余言而誣。請觀李母。蓋余自得交於虛所來。暮舍樸三昆仲。因竊聞李母之起居。李在范陽。爲衣冠世族。當潤泉翁時。發憤修累世之業。母實內助。拮据家政。誕育子若孫。後先延禮師儒。皆手自烹調。不純以臧獲從事。至蘭桂扶疎。蜚聲北冀。而母乃怡顏安子。若孫之養。年且七十有七矣。先是母以勤劬勞瘁。居恒抱病。乃今年益進。病益退。五官之用。不減少壯。時屬在親知者。羨人倫之盛。而頌阿母之福。則謂一堂四世。詩禮彬彬。旁觀譚之。猶足以怡心神而壯氣骨。阿母身自當之。其樂且壽。何疑焉。而余不盡然之也。嘗見連枝之榮愈繁。墳龐之吹愈少。祇以闔牆爲父母憂。卽養親一事。分彼此較賢勞。偏具一餐。不勝自德之色。士紳何事不據齊民上。獨骨肉少恩。有時反出其下。則李母

之樂而壽固別自有說爾余頻過雙桂堂抵掌於金昆玉季而醉心焉非一日矣座上無非類友案頭無非聖書其於做人根本不啻講之熟而行之力試觀兄弟叔姪父子之間雍雍穆穆生人本相隨在而露因竊謂此阿母所以壽也復繇外測裏妯娌姊妹之無異同也又阿母所以壽也不啻惟是問有餘必曰有曾子養志二字爲千古擅場微聞李母有不能不繫心之處爲之子者先意承之不待言也夫人情即所繫心而或難顯言卽旣言之而或難再言非承於言外何繇快愉乎此尤阿母所以壽也人子事親自是本色而所以壽者端不出此可深長思矣大要順親一事行之者不爲有功卽不行者親恆內傷而外護之恐其被此名也子亦借其謹以自安復自謂無罪功者人之所趨罪者人之所避今以此事處於非功非罪之中其誰過而問焉愛日二字久受塵蒙賴李氏昆玉一發之也故家遺俗天每借以留一綫之生理開斯人之耳目壽其親以及人之親不匱之思錫類遠矣

贈賈正卿廬墓序代門人

固安賈正卿父喪廬墓遠近知其孝服除遊啓泰孫先生之門已而復從吾伯順先生遊吾輩相與朝夕卽不煩言說而真情至性已洽然襲人腑擗人腸矣歲之丙辰正卿復以母喪廬墓吾輩往問之擬乞先生一言而又值先生以雞骨廢蓼莪也又何敢以是言請因共竊取先生平昔之意而湊爲詞曰正卿廬墓聞者異之詩書所載何以加焉然正卿質樸近魯博綜未遑蓋模心非模古也卽異之者亦各自有當於心非謂其當於古也不學不慮孟氏刻畫此良心者至矣寧直達之天下實達之萬世此往古來今所

不能異同之脈而情矛智刃所不盡剗除之根也。有能於倫理中無愧此良者。卽以古人目之。而其實非藉古以重特爲傷今志慨耳。人之不古。惟其不人也。人而不爲古。何憾人而不爲人可不深長思哉。仁者人也。親親爲大考。諸喪禮飲酒食肉復寢。在旣禫之後。而以觀於今何如也。如以儀節無當禮意。食稻衣錦。尼父於宰予有深恨焉。彼所謂稻錦在期以外。猶以爲是無三年之愛於父母。而以觀於今又何如也。則今人之所謂三年。猶不敢當宰予之一面。尙何言哉。然吾不謂不學不慮之言。至今遂不靈也。嘗見食稻衣錦者。□□囿於習俗。無不安之意。而微窺其際。實不能甘。夫不甘卽不安之芽。特世教衰而迷於其故耳。大要今與古之不相及。總是流俗之權重。而良心不能自現。卽實抱其不安者。於將達未達之際。四顧流俗。而反若以變禮爲自羞也。當是時。毅然前往。直至其知。不□孤懸之竅。中被茅塞。若正卿者。勇過孟賁。遠矣。先生以躬行勵吾曹。每口實正卿。不啻說項。吾輩而躬逢正卿。不敢不自謂有緣也。觀感之益。較得之詩書者。不啻什倍。蕭蕭原野。鬱鬱松楸。棲遲於風淒雨苦之中。奠獻於兔擾猿啼之際。行道指目。無不斷腸。矧吾輩素服先生之訓者哉。先是孫先生兩廬其墓。不數年而正卿繼之。百里之間。名行相望。蓋天實爲綱常一洗垢塵。士生斯時。而猶然與波俱逝。恬不動於耳目。罪比泛常。當加等矣。因筆諸絅。□以志勸勉云。

贈耿峻坊舉秀才第一序

國家待士蓋不薄矣。士每薄於自待。自薄至於不可言。其害還中於國。故國之課士。在循名責實。士之自

課在顧名思義民業有四士居其首其名芳其術尊其處恬其味澹卽陋巷環堵而先天下之憂卽矩步雅歌而習大人之事所謂繫聖賢之籍也然僞士反藉以自匿其跳愈甚其匿愈巧故農不農工不工商不商其術不能眩人其勢祇爲自困惟士不士則無從而按之其敢跳于名教外者不妨以其匿而進結當世之知盱衡宇宙所稱貪淫冒市井之所羞陰賊犯鬼神之所忌濁惡暴滌之氣纏縛震盪於兩間者大概士爲之也螢雪所伏以讀簷暑所持以獻如戲場搬演於己了無干涉賈生復起可勝太息耶近有議制科之外間行舉辟如祖宗朝故事者復格不行夫極重之勢至不可返國家誠無奈士何矣獨士具鬚眉誦孔孟至以天地父母所生之身爲國家無可奈何之物清夜自思何以置面也余友耿圖南篤行士也其子峻坊受知督學徐公舉秀才第一人葱菁玉樹愉快可知唯是余於圖南爲塵外交故不欲徒以峨冠博帶爲今日榮亦不徒以三槐九棘爲他日券而申名實之論期峻坊不愧於士也更雜陳雅俗求或一言之有當於峻坊因效學究生活爲秀才下一註脚秀者秀也吐華曰秀見於傳註三物論秀本於周官國家之倚重士而備責士今古一轍三物多缺卽雕龍繡虎不秀之甚耳且顧名思義峻坊而知而翁之所以命名乎世有四維禮義廉恥維己維國皆是物也又聞先哲取法乎上夫士四民之上也舉止當於凜城稱第一止以文藝稱第一耶椒山先生之言曰本來面目頻頻照恐落寰中第二人願峻坊共勉之

賀王太沖舉秀才序

太沖既補邑庠，稱觴至者，非必盡尙往來也。則以太沖之蜚聲早而入彀，遲潦倒名場，不無積薪之嘆。從旁憐之者，非一人且非一日矣。聞其售而驩然相告，眉若開肘若翼，麇至於庭，亦自忘其爲先施也。余當是時，驚魂稍定，欲次第數語，以佐賓觴，黯焉回首二十年情事，齊到心頭。太沖太沖，而今乃售乎！夫區區青衿，何足重輕？居恆抗顏揮麈，不難等三公於一羽，而直於太沖屈伸之際，乃若是其介介，蓋自爲解曰：秉賦維均，豈其間歲爲暴爲賴？子弟判然，業儒者資非上智，能不以得名爲富歲耶？坎坷旣久，意氣漸灰，卽好盡言者，亦不忍於落魄之人，強爲督過，其狀誠可憐也。今而售矣，頭角換眉宇，舒境界，新精神，鬯其爲進脩之藉，可勝言哉？且乍伸於久屈之餘，較受困未深者，得力更倍。自今伊始，吾黨得承向榮之意氣，以進無已之切磋矣。夫做人二字，余所奉教於君子者也。每對二三子，提爲譚柄。而太沖余所偏暱，刻畫往往加詳。蓋人之一生，遭際層累，階級名色，日遷月易，所做多端，而總之無非此人也。有愧不論軒冕，無愧不論韋布，愧非外來，憑人自造。做小人之精魄力量，亦何減於做君子？而君子以造作慊，小人以造愧。將何從焉？然做別事猶有待也。做人則隨其所在，此日此時，此事此心，便可下手。人而不斷然決機於當下，未有能做者也。卽就太沖遊庠而論，行素所升之堂，顏以明倫，而父母俱存，兄弟無故，復身際之，則做人於此，舍孝弟何以焉？太沖聞此，極熟習此，極久而庸德庸言。尼父歎其未能，吾輩敢自謂行無不足，言無有餘，而不兢兢哉？是役也，太沖奮翼，旣繇屈而得伸，相知彈冠，自改憐而爲勉。特余以罪逆之人，而

踵諸相知之旨誠屬強顏惟言者以口騰受者以身踐是或一道也

賀陳范彭入學序

歲戊午余表弟陳范彭應督學試以第二人入學區區青衿何足爲范彭奇而余繹入學之義不能不喜則古有讀書不識字之說獨范彭可稱識字耳操鉛槧以應里選入學者不乏人而學字曾識否二三子以舉業問余強顏與之言學蓋工文者必識題而題誰氏之語且其做何事所著何境所用何功此之不解筆鋒縱利憑何發抒而可舍學談業耶余亦於聞者眉睫知其以爲迂而復强聒之且曲誘之曰此舉業捷徑錢心漁打蛇得七寸之說每刺刺口實而聞者猶界然疑今得范彭而余言乃有徵也范彭與其兄金溪先庚子孝廉夢日君之子余長姑所出也兩大人物故藐孤方幼伶仃形影未解自憐內憂外悔門漸蕭索余入京取道每過而問焉今昔盛衰之感淒然刺心有意無言有言不盡之衷尙一一在金溪范彭心目間蓋相關之情不能自己而金溪遂以范彭託余也范彭肄業未浹歲而成章日月幾何詎能淹貫則范彭聞余談學而深信真舉業不在學外也探經考傳務求實底舉微危消息欺慊關鍵悉就吾身日用間認之不敢據紙上爲活計故人所窮年佔畢苦於望洋者范彭以數月得其要領問切思近領略甚速始信德性中原有無窮智慧特人自不著手耳薛文清云讀書吾得其要天命之性是也范彭范彭可與言讀書錄矣大要士先立志十五志學尼山自道亘古來一學字惟有志者識之暗室千年一燈立破數年前此范彭也一變志道盡脫習氣恂恂雅雅起人愛敬有數年契闊忽逢於今日者訝其雅

重不敢認為陳范彭。余省其狀於同業諸友交淺交深。當面背面無異辭。其得士心如此。范彭真志士哉。丈夫方寸屬我。風雷一奮。何事不可爲。冷暖世情。高低人面。據一時以判終身者。何見事之晚乎。學之分量。包裹乾坤。識得此字。更無難字。余於范彭入學。不欲以世途賀。套汙吾齒頰。特謂識學字之人而入學。可稱天下名實相副之一事。而吾且以范彭爲左券。令修舉業者。不以談學爲迂。則所關於士習良不淺云。

旌孝申文

容城縣舉人孫奇逢。中庚子鄉試。其父以諸生授儒官。年五十五而卒。奇逢哀毀骨立。苦次一準古禮。既葬其父于鄉之北。號泣墓左。竟日風雪中不能去。偕兄若弟結廬居焉。顏之曰。時思營一室。墓前陳其父之冠履圖書。顏之曰。棲神是役也。畚鍤親操。囊裳濡足。汗血污泥。觀者嘆息。旦晚羅拜。每食必獻。如事生者三年。服除甫十一月。其母殂。葬祭依廬。一如前禮。家故清素。備遭艱虞。且益落至。不能具朝夕。兄弟相對。食淡茹苦。蓋前後六年云。當是時。其恨終天。其貧到骨。曠野蕭條。晦明寒暑。煢煢諸孤。或左或右。時奇時偶。徘徊於猿啼兔擾之間。經行其旁者。無不洒淚。鄉人士爭爲詩歌以贈之。勘得舉人孫奇逢。異姿出衆。至性自天。六載極風木之悲。一廬壯山河之色。煙壘霜籬於此地。復識古人之道。形銷腸裂於斯人。再見赤子之心。事以禮。葬以禮。祭以禮。匪徒空文。不飲酒。不茹葷。不御內。見諸實事。且恩重墳荒。允稱孝友。義絕請謁。無愧孝廉。誠爲空谷之音。庶幾終身之慕。綱常倚重。風教借光。理宜表揚。以作孝思。

答袁滄孺書

不孝受知翁丈。非復世俗境界。學焉得師。私謂天幸。未幾遭變。轉啓衷者爲奪鑑矣。哀迷中。過承骨肉之愛。都不甚省已。而魂魄略復。半忘半憶。每一回首。感繼以慨。秋高拜別。忽入朱明。病骨稍強。猶半在枕。話長則眩。坐久難支。兀然廢人也。時唯置翁丈兩淮議於案頭。神爽開卷。略昏卽闡。旣蘇復開。念有所寄。神覺漸王。夫國事孰急於邊餉。邊餉孰重於鹽利。鹽利孰多於兩淮。兩淮孰壅於今日。非大議。孰爲疏理之法。非翁丈。孰爲疏理之人。卽哀疚小臣。每中夜而起。以破常格。救根本。望諸廟堂。今果然矣。是役也。簡命隆事。權重治人。治法合併而出。乾旋坤轉。千載一時。蓋國家大命所繫。二祖實式靈焉。如僅爲翁丈一人之遭逢。猶其淺爾。旬日內。膾在口。熱在腸。習習在腋。舉醫國手段。先竊之以起病。惟是兩淮之事急矣。望疏理之前旌。如望歲焉。想翁丈任事急公。旦夕就道。而數千里之遠。當有數年之別。脈脈此情。專介代叩。

回潘懷魯書

臥病中。忽接翰教。無異從天上至也。展閱再三。精神飛動。天下事原非盡不可爲。而似仁兄於過家之時。爲體國之事。摶勢犯難。手挽天河。卽做事人亦不肯爲。然不至是不足以見真男子自有本色也。軍屯、鹽餉。原是國家足邊恆產。凌夷至今。仰屋之嘆。脫巾之呼。遂不可言。經國者不於此清理。別議搜尋。終非本計。有味乎仁兄好爲清屯張本之一言。二祖神靈。實式憑之。大要吾輩犯得一分難。便幹得一分事。拚得一分官。使做得一分人。屯、鹽二事。袁滄老與仁兄分任之。袁之南行。亦有無限波瀾。向非杷柁。挽定幾不

免於掣肘矣。天生兩賢，膽智相亞。弟無似，得遊其間。袁前以疏理事使聞於弟，仁兄復以清屯事使聞於弟，皆以同調挈我深感至意。至於仁兄清屯始末，更願詳聞之。蓋欲竊大英雄之作用，以啓愚蒙，異日病骨或復尙欲荷戈麾下，一效馳驅也。

答范景龍書

前聞麥種千石，作用甚奇。嗣又聞破成例，以千石穀作汲長孺事也，則又奇。收利數倍，固彼蒼助順之心，萬泉何幸。不後不先，而門下適至也。抑天欲顯經綸之手，特令與此時相湊耳。某卽憂病中，藉奇蹟爲對客口實，弱骨增王。每憶羅念菴之答唐荆川有云：此生若活得千人命，便甘心不向世外走。有味哉，其言之也。執是言以論滔滔者，孰似門下向此地中討得受用哉。夫立己脚跟，與仰人鼻息，孰勞孰逸，孰巧孰拙，且直道在人，未應全滅。未見利鈍之數，盡如世俗之所稱也。覲期不遠，預儲洗塵百斗，與同志環聆經年作用，以爲大快。

與范夢章書

前承遠存，匆匆裁謝。懷德之思，鬱陶無寄。惟時把玩手札，紬繹佳刻，精神淋漓，宛宛如面。夫以全齊民命，仁兄一腔孕之，布置曲折，鉅無不包，細無不入。弟卽不肖，按譜求鍼，蓬心若啓，因嘆總此郡縣，總此簿書，他人以流水數答應，祇成風塵之苦。仁兄以真實心穿透，步步皆自慊實地也。下學上達，有本者如是耳。內召在卽，弟尙欲強支病骨，受約束於旗鼓下，想仁兄不棄我也。

答楊明字書

居今之世，孰有好善不倦如門下也者。客歲侍鄰席，舉世俗張設惡套，一切革去，杯酒長檠，非忠孝節義不談，古色照鬚眉也。每與啓泰兄私論長安局面，漸不可言。何幸臭味有人，擇持是賴。且物色時髦，津津說項，卽門下之留意於人才，知門下之有心於世道也。生自揣無似，不足備藥籠，旣承翦拂，亦不敢自外，聊附於請自隗始之義，捧讀手札，兩腋習習。兒子化麟，亦承注念。古之人薄感恩而重知己，金石可泐，此誼難忘。行且使當世悠悠者知風塵之外，別有一段古道交情，亦奇矣。

答徐恆山書

老父母治平，真爲天下第一。生祠自出直道，不肖猥蒙深知，亦隨班趨事中之一人耳。方自愧受國士之知，而以衆人報老父母，何過聽而云云也。玉田之治，已稔聞之，有脚陽春，隨試輒效，政聲流通，內召在卽，忝辱知己，藉光無涯矣。時事人情，誠如台諭所說，堅白在我，磨涅何妨。不肖家居無所聞，而敢料老父母之必內召者，以殊絕之品，有目共識，不比他人小賢，可甲可乙也。夫生民休戚，總係吏治，自主爵者論資格，而巧宦者工運用，安得天下有心人翻此俗案。冷局散吏，徒抱憤懣，諺所謂會睡的無被蓋也。因手教而及此，遂發狂語，一笑置之。

認眞草卷九

待放草

贈張子于度序

余以發金花被罪杜門。張生于度自新城來視余。留十餘日告歸。是時生方以文高等廩於庠。余於其歸復談藝文論賞鑑。而俯仰今昔。嘉生之能自立也。生於余友孫君爲子婿。孫君廬墓時。生尊其父之治命。就學墓側。余一再過。奇其狀。謂之子嶽。必能自立。未幾。偕槐生、賈生問業西江之滸。余官民部。生又以孔生、李生來謁。假館禪棲。旦夕質問。數月乃歸。生負奇姿。益以攻苦。文日有名。諸皮相者驚謂何物。張子咄咄逼人。而生固不措意也。大約人得陽氣多者類君子。得陰氣多者類小人。陽氣多未必無失處。陰氣多未必無得處。而以大概論分數。則去彼取此。張生之言大近於謗。口直近於淺。節疎近於慢。意猛近於凌。而其見短處。卽其任真處。於世味無情者。於名義有情者也。於非類面冷者。於同調腸熱者也。運用湊泊。固不能爲生諱。而剛克柔克之說。余與孫君就所偏以薦之者。生又不啻韋弦之佩。向來鋒穎漸就斂藏。如帷燈。如室劍。徐按之。固自愜心驟。卽之亦不刺目。蓋原屬陽氣多之人。而邇兼乎陰之用矣。此處情節。靠誰簡點。天下惟自立之人。乃有自得之趣。其文之日新月盛。爲諸士冠軍。良非偶也。十年回首。世事人情。具在有意無言之際。侍嬪闌撫弱弟。伶仃蕭索。有憐之者。有難之者。至今視生。眼當何如。世不乏小

廉曲謹厚貌深情之輩而末路歸結何當生一盼哉人生多一層回護卽減一分精神學一番完美卽薄一分根柢陽原爲主陰在陽中彼陰氣盛者固於做人一簿無緣者耳余淺人也且癡人也卽偶持矯偏之旨以爲二三子鍼砭而已實有愧半生遭際似通似礙受盡人憐亦復受盡人難簡點所得猶未如生之有味乎其中也念庵先生將就冒認四字余每舉似二三子以汗其背至於余之背汗耶不耶敢不以勉生者而自勉

與宋謐寰書

弟癡人也請託之面生平不曾帶得來而說項之口生平不曾減得住百念可灰憐才一念老而轉熱貴屬萬泉范令弟肺腑親然原道義友也素擅才名竟艱一第而治狀則直逼古人蓋所謂做人而非徒做官者也當今之時資格兩字爲吏治之害不淺初因人自菲薄而後遂一例看承卽有真才不肯破格是驅之使不容不自菲薄也范令才品年兄入眼自見無待曹邱而弟喋喋者比於舉爾所知之義爲世道也非爲范令也

答周毓陽書

不肖范陽豎儒知慕先生久矣日讀東來大疏嘔出心肝固朝夕思得一當以自附於同心之誼金花方到從權借發微誠未能動天而洪恩僅從謫外乃辱先生遠念以踰涯之獎加非望之人此自先生引掖後進盛心而莊誦汗顏幾致顛仆矣不肖棄一官如棄而得先生片語不啻百朋當是時先生支撐遼海

肩難謝之擔。引罪之章。誠不敢聞。唯手額祝大謀蚤定。國恥蚤雪。使澤畔逐臣。得優游卒歲。當擬凱歌。不敢賦楚些也。

與張溶吾書

老父母榮任屈指月餘矣。仁風薰被草木知春。凡在宇下沐膏雨而盪絃歌。其色飛何似也。久缺修候。疎節之罪。總恃海涵。茲啓爲舍親容城縣生員孫奇遇。兄弟四人。一爲孝廉。三爲茂才。執喪一準古禮。廬墓六逾春秋。孝友兼全。鄉間稱爲人瑞。已經前按台毛公祖、兵尊解公祖節次旌獎。今者歲考。奇遇抱病入場。委不得意。開號竟居六等。此生甫及壯年。尙思力學。忽以一日文事之短。遂沒生平行誼之優。不無可惜。本縣念其素修。欲爲申請。仰乞鼎重於太尊老公祖前。稍一斡旋。但得申至學臺。或可望留一線。匪獨此生感瑕瑜之不掩。益期奮於桑榆。兼使合郡知文行之相維。更有裨於風教。台慈聞而憐之。想亦不難爲之引手者。特愛妄干。伏冀垂察。

與齊羣玉張鳳圖書

茲啓舍親容城縣生員孫奇遇。兄弟四人。一爲孝廉。三爲茂才。皆篤行人也。執喪一準古禮。廬墓六逾春秋。孝友兼全。鄉間稱爲人瑞。已經前按臺毛、兵尊解太尊武諸公祖節次旌獎。今者歲考。奇遇抱病入場。委不得意。開號竟居六等。此生甫及壯年。尙思力學。忽以一日文章之短。遂沒生平行誼之優。豈非天哉。但衡士者固必論文。尤兼採行。以篤行孝友之人。即使未列斯文。尙可破格作養。以宏摩厲。奇遇偶緣病

謬永擴宮牆旁觀所爲惋歎者也。本縣念其素修欲爲申請想李老公祖爲人材風化之主聞此亦必憫然弟以部民未敢輕爲唐突仰藉年兄鼎重先達於李老公祖倘得申至學台或可望留一綫不獨此生感瑕瑜之不掩益期奮於桑榆兼使合縣知文行之相維更有裨於風教弟硜硜自矢不慣代人作懇恩之事茲更有所激復破例爲之亦恃年兄之知我也。

與范鑑田書

容城孫生竟借鼎庇得還故物此在奇遇一人關係猶小獨因是役使三輔士於文藝外另開思路恍然睹人生最初本相老公祖眞斯文盟主也事至此不可於風塵摸索不可以世俗報謝真是一段佳話吹振三綱掩映千古爾不肖卽待罪杜門未得躬叩而感動流淚心傾於冰臺矣已而深念有心人如老公祖而今得在其宇下地方關切利害係千萬人性命之事而不以上聞當面錯過將成長恨敝縣勦戚籽粒害民已極佃戶有狀生員有呈鄉紳有揭援青縣文安近例求減半折徵本縣已具申各院已俯允批行詳報將洞悉其苦以憑題奏湯火之民歡呼踊躍忍死須臾以見德化而忽生關隔停閣踰年本縣再三申催竟不能徑達於院此事起根在縣過脈在府道收圓在各院仰祈老公祖大力於太尊李老公祖前一爲斡旋過脈一通首尾相應一方民命賴以更生無限陰隲也不肖等公揭乃去年所投於縣者今併呈覽前月舊屯院盧公祖復爲文安減徵再疏昨謁新屯院左公祖談敝縣籽粒之苦更欲卽舉而措之專候府縣申至卽具題矣此等地土不肖實無半畝旁觀民困心竊傷之每至忉忉而今幸遇老公祖

是天不忍終棄此佃戶而存其子遺也

答范懷洙書

萬泉治狀得王直指推轂之語而直道大彰弟舉手加額據地躍起蓋爲世道人心發此佳興甯直爲老親家一人之知遇也弟去歲補官四十七日而官罷國家自有如天之福臣子妄切杞人之憂螳背空折驪珠未探目擊苟且之法鱗布窮簷蓋怯於格上自勇於剝下著數相逼不暇爲根本計矣恭誦手札感激切十年來期許千里外神情令人歎歎復令人骯髒至稱引范蜀公一段同心之言一字一嘆耳逐臣之禮幾經推敲去冬決計相知者以爲太遽甯耐至今可無悻悻之疑矣二月初卽返故園因授槩之使以聞

柬魏廓園書

大賢過里雞黍相陪真趣流行弟亦自恕其簡率也最得趣者孫兄之在座夫以數年聲氣一旦湊合真稱有緣耳仁兄盛使如尙未到弟有圃有茅屋原是當年讀書處今早掃除薄暮粗具特知我之深敢再勞玉趾徘徊於容膝之地卽無奇味供養而泉冽酒香脫粟可飽仁兄豈厭之耶區區數種謹獻非報也永以爲好也疑義快義祈先發數冊

與范夢章書

弟以僻韻誤辱元賞從前教愛愧無可當然肝膽猶存河山無恙固不敢借逐臣名色懶散作惰民以負

知己也。邇因耳目所及觸我熱腸爲仁兄一道之易州守徐君廷松其才其品人所共知甯直上谷推第一也。乃今不得上官意矣。揆厥所繇祇爲太顧百姓自徐君治易百姓如脫湯火而就衽席獨有衙役不喜奸惡不喜今乃復爲不同志之上官所困衙役與奸惡。僨其不獲乎上遂得乘而媒孽之嗟乎犯三不喜而顧百姓智者不爲也。然事至今日尙堪士大夫之多智哉。遼餉煩興持籌大老怯于格上而勇于誅下加派如鱗徵求到骨不肖有司借之以爲利。徐君苦心苦力欲爲此時之鮮于侁其斟酌經營騰那運用斷不肯白取民一物多費民一錢其於上官趨承全少上官卽不言且以行與事示之徐君奈之何哉。徐君初旣以爭執錢糧不得於府尊猶望提攜於刑廳近亦露不然之意矣。生員劉斌被誤徐察其情欲出之而刑廳堅欲入庫書劉名芳異常奸惡徐發其狀欲成之而刑廳堅欲解其最明顯者徐君應薦而不肯開薦漫云俸未及也。夫玉田與易州同一按屬各院薦章通算原屬之俸而得列者其人具在何獨於徐君而異之則中有物焉故也。弟密邇易水觀聽最眞彼中士民愛戴徐君有憫其太勤過於勞者有憐其太清過於苦者然勞是本分苦是本色人憫人憐弟獨爲徐君甘之唯至於以顧百姓之過而失上官之歡漸有不得安其位行其志之勢則易之士民皇皇如將失恃而弟亦爲之歎歎太息憤焉不平也扶持世道以愛惜人才爲肯綮四顧徧徨同調有幾舍仁兄而誰告焉弟憶仁兄言王立宇公祖亦知徐君者復命薦剡借鼎力從臾之何如徐君固感仁兄國士之知而不敢以世法事大賢也弟今又爲秦庭之泣仁兄必有以處此矣。

與賈孔瀾書

弟在署時全借提挈得免於悔事後追思倍切感激以友輔仁旨哉言乎廓園兄過我留五日於扇頭讀佳韻不啻親炙近亦擬彷五君詠體奉懷諸友容覓扇錄之今孫大親家如京蓋事有干繫不敢輕付人手從來機密事須腹心人乃可託耳大要弟生帶癡心每管閑事其詳具在投劉耿范書中詞煩不暇再錄特開口待親丈閱之更乞親丈面授之諺云打鼓詞流冷淚弟則謂人心不死何分古今說到古人急溜處而不墮淚者其人必不義矧當吾世親見有可流淚者安能作膜外觀哉弟所分囑於衆兄者又總託於親丈從臾斡旋定有妙用也未知肝膽向誰是令人卻憶平原君熱腸一片兩地共之

答賈孔瀾書

徐父母事大定矣兄輩憐才盛誼何愧古人哉從來澹題目非熱心腸誰肯做此時羣賢萃聚左提右攜既以專功爲時事濟艱難復以餘力爲一方持公道弟卽行吟澤畔有餘憾矣仁兄又臚列半舫樸公文弱明衡金谿以及徐師之聲實而以己游其間是極快活境界前以片段之說易尊鱸之思太樸鍾元兩兄俱以弟爲知言仁兄忠君信友何所不足而學張翰耶

答劉半舫書

歸來每對友生卽提仁兄在口不自禁亦不自覺也易州公竟藉斡旋爲世間留此公道所謂一人知我足以不恨易州公得此於仁兄亦足矣悠悠世俗每以憐才爲閑事憂國爲閑愁誰似兄好管閑事誰似

兄好擔閑愁。諷詠手札。言言欲涕。而僅開眉於文弱新餉之一節。有心人肝腸如此。弟在局外。欲雪涕爲笑。然怕燃犀之見。謂弟作違心語也。事至今日。涕也難涕。笑也難笑。扇頭小詩。情見乎辭。然以博兄笑耳。莫更惹涕也。

答耿樸公書

弟在都時。曾以癡自狀。而并欲於此字加仁兄。仁兄坦然受之。不以爲忤。我輩但行己意。那管世眼。而譽望沸騰。推轂者爭先。此天理不盡銷沈之一綫。蓋以間執讒慝之口。而堅獨行者之心耳。旦暮司銓。是廟社之福。不獨二三兄弟之光也。世道轉關。以進賢退不肖爲綱領。丈夫有志當世。安得避此。又何必守令而後行志。只要真實心腸的確識見。而又善爲運用。於不可奪之中。行不必言之意。畢竟所補者大也。如以畏首畏尾之爲憂。又非我輩本色矣。大要有心於避。與有心於就。恬競若分。而皆從自身起見。過猶不及。願仁兄以無心處之。

答耿樸公書

仁兄天下有心人也。所稱不作寒暄。不亟裁答。弟生平無所解。偏解此味。至於布算之周。下著之穩。誼重憐才。不難深入。仁兄指日戈補天石。卽一節亦具全體。所謂搏象搏兔。皆以全力也。此段情節。卽祕之又祕。不漏鍼芒。而精氣噴薄。已畫暉天表。夜曜斗間。使世界中無此一段神情。則乾坤之毀久矣。獨手教中。有謂斷不可令此君知。蓋莫非無爲而爲之意。而弟則以爲過矣。知己之感。千秋所重。使此君而遂竟不

知所從來於理未協卽清白之吏不能厚筐篚而受恩之人自合通肝膽兄自用兄法弟自用弟法此君自用此君法敢抗顏而裁之君子仲尼之徒也豈爲已甚哉平心思之其理自見弟何敢面從而背違焉

與徐明衡書

弟之知兄與兄之知弟俱不得向世俗人說兄自能脫俗弟有志未逮手教娓娓評弟過實面孔如火而弟固望之以爲鵠亦可得力兄之自勘過嚴反覆攻擊渾是一篇語錄弟又借之以勘己得力莫大焉時事誠不忍言我輩生與相值只得辨下著底路數兄榮遷在何部卽就其位以謀其政此在兄鐵骨雪腸無不遊刃弟拭目觀之傾耳聽之矣兄盛名已滿天下從此後就斯人言前之信以抒己未竟之施全在無言之地自爲猛健外人靠不著也不愁不上青霄去上了青霄莫愛身敢以是爲贈

答楊允諧書

逐臣自從去國卽散髮入林尋釣游之樂迎大僕鍾元兩兄於江干蕭寺下帷之暇縱談古今此懷殊不落莫近復偕兩兄並同志者數人泛舟於新安水色襲裙荷香撲面烹鮮佐酌歌詠互答其樂忘死聖恩之所以錫逐臣者侈矣但回憶故人遂如天上不得把臂以共勝游爲悵悵耳野夫近狀可爲知己道者唯此

答徐元扈書

三復手教慨繼以憮老師一舒一捲初志較然獨時事實未見可緩而人情如是殊可憂耳門生自蒙環

召舊疾嬰絆，尙未束裝。何遽有筦庫之役，在籍之人，無聞無見。既無繇求免於擬議之初，又不敢控辭於成事之後。夫復何言？但病軀素畏劇，煩僻性復厭阿堵。天下豈有力不支意不欲而能勝任者哉？用違其才，稅駕何所？此誤辱當事者之物色，而實非所長也。見今頭暈吐痰，日就醫藥，待可支持，勉圖就道。惟老師於萬老先生代申此情焉。

答萬惺新書

不肖方起罪廢之餘，遽有筦鑰之役。既慮其難任，復訝所從來，比得敝座師手札，乃知出台臺意。台臺才高一代，品冠中朝，宇內羣倫，欲邀一盼而不可得。何所取於駑駘，而三顧焉？士爲知己者用，敢愛四體。惟是事未素諳，任難奏效。台臺旣始之，復望終之，預畫規條，盡情指教，當以匹夫之志守之，庶不負先帝之玉成，而竟無辱大賢之物色耳。

答范懷泉書

老親丈治邑，原求自信，而竟以獲上。彼推轂者，熱腸可想，而亦惟拙宦之人，乃於不意之地，每有奇緣。此處全是一造物妙用。回陽和一脈於固陰冱寒之餘，彼推轂者，均在其摶挽之中，所謂相與無相與也。然新主仁聖，另闢乾坤，舉手加額，中外所同。弟以澤畔逐臣，遽蒙環召，被命以來，且感且懼。倘末路自繞剛腸，使此行徒成蛇足，且負先皇之玉成，而爲知己羞矣。老親丈何以教之。

認真草卷十

典餉草

請發帑疏

爲遼餉督催愈急。新庫空虛轉甚。懇乞聖明速發帑金以濟燃眉事。竊臣起罪廢之餘。過蒙聖恩使管新庫。則餉之出入惟臣司之。而其有無惟臣知之。遼東甯前天津以及薊密昌霸或以戰士之月糧索或以援兵之行糧索。或以召買之價銀索。諸臣情見乎文移委官口窮於叫號。而莫不刻畫時勢難待。挪借已窮之狀。而庫無以應。前件未足後款復開。領者尙留。催者踵至。而庫又無以應。夫兵急則餉不得不急也。月糧行糧折色本色事勢相逼。同條共貫。總爲遼事也。苟一節之不應。將全體之俱傷。而索之急如此。庫之空如此。數月以來內帑頒及遼左者。非不數數第所頒者賞也。非餉也。賞無定額。特一時暫沛之恩。餉有成規。實按月常給之數得賞於分外。雖不勝喜。缺餉於額中。殊不勝怨。究之賞暫而餉常。故怨多而喜少。至以百餘萬之沛發。而不能解遼左之急者。政坐此犒賞之銀不能爲月糧。不能爲召買故也。委官守候。有一月者。有兩月者。有三五月者。臣每一出。環臣而泣。偶獲外解。聚首而爭。酌量分給。十不得一。又復嗷嗷擁訴矣。卽加派搜括。郡縣多急公之吏。而梯山航海解納。非盡一之期。彼饑軍饑馬。豈肯有待而不脫巾。米價豆値。豈肯有待而不騰踊。當尾不與。事後何追。臣縱欲對蹙額之委官。強作無情之面孔。而能

不扼腕於征夫寒心於國事哉臣懼極而思無術以處反覆窘迫而恍然悟曰臣得之矣蓋此事於臣爲職掌於皇上爲家事臣之職掌臣能知之而皇上之家事非皇上誰辦之況皇上天縱英明深爲遼餉吃緊李進忠田詔贓銀不以入內而以濟遼也罪人房價不以入內而以濟遼也邇復憫念征東將士寒苦諭部行賞言生遼海之春字字隕征人之淚皆發自聖心非廷臣之入告也使知索餉之急新庫之空豈難渙王居以酬死士乎此事此情臣非管庫臣亦不知皇上何從知之今臣知之而不以入告是壅遼東將士之苦而不使上聞復鬱皇上事事爲遼之德意而不使下暨也坐待軍心之變立貽廟社之憂臣之肉猶足食乎今臣入告而皇上旣知之必有所以處之其則不遠有先帝之家法在蓋大內金銀之氣久蝕日月之光先帝不難破一悞以發之天宇重開氣祲漸解無窮之志事端賴於皇上之繼述及今而出內府之所有餘補外解之所不逮使索餉者隨叩隨與則得餉者士飽馬騰戰勝朝廷此爲上著不聞賈人之術乎賈人流通千金以權出入而必於每歲常數之外別操贏餘以備不時之需不使有中斷之隙從來財用有本則相生易脫節則再續難理固如是今日遼餉何等關係而可聽其脫節不爲之所也外解之來各有程期卽欲強先一日而不能遼餉之索急如星火卽欲姑待明日而不可則所以別操贏餘爲外解之接續而使新庫得環中以應無窮非帑金百萬曷克有濟且新餉原附太倉舊庫舊庫雖號空虛然外解款目尙多如遇遼餉告急猶可通融挪借今驟分新餉另爲一庫譬如窮人素倚鄰里爲命一旦孑然獨處卒有緩急憑誰奔訴而又誰爲匍匐救之者乎臣今日之請非但司遼餉言遼餉實在新

庫言新庫計窮力詘不得不出於此懇乞聖明俯鑒新庫轉空立發百萬以濟遼急庶不失特設此庫之初旨而罪廢小臣亦得竭頂踵以報聖恩於萬一遼左幸甚宗社幸甚

再請發帑疏

爲經臣畫有成謀軍需急無所措時難再遲補牘伏請懇乞聖明速賜批發以與經臣協應事竊惟人之周身一處有急全體皆應不待商度不煩驅策蓋貫通之至也國家事勢猶之一身宮中府中俱爲一體疆場廊廟不宜異同稍有關隔卽成大病居常且不可況濟變乎臣於十一月二十日曾奉爲遼餉督催愈急新庫空虛轉甚懇乞聖明速發帑金以濟燃眉事候旨逾旬未蒙批發伏念臣自蒙恩復職至今仰見我皇上厲精批答無留中之疏一旦留中自臣疏始豈以臣疏爲無當而留乎乃未幾而經臣袁應泰以戰馬三月無料告矣臣部堂官李汝華方據疏請帑而經臣戰守次第之疏又至矣年來邊事規模未定苦無結局之期經臣建此大策料敵於指掌決勝於運籌期以兵馬糧餉正月齊足而後舉事夫以疆場之大計如彼目前之近期又如此而磬懸之新庫外解寂然內帑不發皇上試思此事關係何如哉糧料不足則戰守必不能決戰守不決則撫順必不能復是國家所恃以保封疆奠社稷者全係於經臣復撫順之一策而經臣之策所恃以及時展布不歎掣肘悔噬臍者全在於正月齊足之糧料今十二月十二日矣屈指正月能有幾時卽皇上今日以見在帑金沛發百萬付臣庫中臣卽刻發付委官然幾日召買幾日轉運已懼後時而況守無一錢之空庫待不可定之外解豈不誤師期而撓勝算哉天下事不一

勞則不永逸。不大費則不大省。明春撫順之復爲必不可少。誤之著。正月糧料之運爲必不可缺之資。則今日君臣上下俱當同心協力。以應經臣之畫。必不謂空庫可株守。外解可徐待。內帑可不發。師期可不應。而徒狃眉睫之暫安。以臣疏爲閑題也。臣竊計自今至歲除。十八日中。一時一刻。皆明歲布置精神結聚之會。聖天子與賢宰相。寶愛寸陰。奚啻尺璧。倘宮中府中不相通。廊廟疆場不相應。大內有用金錢。不以養士馬。目前緊要日月。不以籌兵食。轉盼而元旦。又轉盼而元宵。正龍飛介覲。虎拜揚休之日。臣方且隨諸臣後。呼嵩祝釐之唯虔。安敢哆口封疆。大聲疾呼。以瀆九重之聽哉。是今日不言。非直誤今歲之十二月。並誤來歲之正月也。誤在十二月。猶曰姑待正月。誤在正月。臣卽欲待。而經臣其安能待之。經臣時不可待。勢不能待。機不容待。而執無餉以責臣。臣之罪其尚可誅乎。此臣之惴惴冰兢。日不甘食。夜不安枕。灑血補牘。以申前請也。懇乞聖明急下臣疏。以臣言爲是。則允臣之請。以臣言爲非。則罷臣之職。假使臣今日不言。他日有追論誤事之臣者。而并以及臣。臣其何辭。臣不勝激切待命之至。

與張誠字書

遼餉中斷。師期已誤。叫天不應。禍至無時。憤懣叢結。舊病復作。顧影自憐。歸計已決。有辱先帝之曲成。併負知己之提挈。命也如何。黃書辦前承台教。已許收用。而自入京來。以此事求進者十餘人。皆强有力者也。一概謝絕。彼猶相強。某再思古人有言。士詬於不知己。而伸於知己。盱衡四顧。知某之深信某之至愛某之過護。某之極。孰有如台臺者乎。於台臺之前。而猶不敢直行其志。他何望焉。今不能恝然於黃書辦

一人遂無以塞十餘人之口。卽欲強塞其口。必不能服其心。再三躊躇。猛焉一斷。併黃書辦不用。而某可直言正氣。硬驅此十數輩矣。管子論知我之恩等於生我。固恃台臺知己。不殊古人。遂割徘徊猶豫之情。行舒眉展眼之事。從此庫中祇照京糧廳考選攢典之例。永不設小帽書辦。某自負此。卽所以報知己也。

答徐玉堂書

寅臺何所過聽。而過譽如此。使弟無實而得名。無功而受賜。自顧面孔。媿汗津津矣。比以外解不至。新庫
磬懸委官之叫號。久迫東方之師期。又逼具疏請帑。以救燃眉。而留中再具催疏。以應經略戰守次第之
疏。而又留中計無所出。具揭投政府而不報。卽本衙門大老。亦以弟爲太激。誚責不已。弟復何望。抽簪一
著。自辦有餘。惟中外全不相應。深爲國事慮耳。手教新餉一萬。已給委官。唯寅臺照單驗收。蓋弟面同解
官。兌發委官。分毫不少也。

答傅丹水書

弟自十一月初三司鑰新庫。閻景陽之往。曾草一書。而景陽行迫。未得挈去。後得仁兄手教。垂格外之愛。
方擬報章。而飛騎告急之札至矣。卽此札未至之前。弟已兩具請帑之疏。元老方以爲無病而呻也。弟與
楊文弱相對涕泣。國事至此。而人心漠然。眼見得大事去矣。計無所出。具疏求下九卿科道會議。又未知
到其間作何模樣。當社稷安危分途之會。而元老雍容談笑處之。文弱特以回啓發抄。冀以感動當事者。
只恐我自涕泣。彼自談笑耳。目今閻寺青庫借銀二十萬。聊以應急。而帑如不發。終難接濟。弟憤懣之極。

已思所以自處。蓋婆娑一官原爲遼餉去復爲遼餉來竟當爲遼餉罷也。但同戴此天卽罷亦不得乾淨吾輩性情生來不會享自在福偏好抱杞人憂天實爲之奈何。奈何仁兄欲裁餉司歸糧廳弟亦欲裁新庫歸舊庫而我自言之誰其聽之同病相憐不禁於邑。

答賀見吾書

遼餉之急卽不奉台教而已憂心如搘。奈新庫空懸久無以應。今攢湊三萬三千兩付藍應試以往中有小錠件二千兩九三四成色係欽賊銀面與委官商議亦可爲召買添搭之用。鞘內各有小單。仁兄照鞘冊一一驗查還賜手教以防他弊更乞令委官常在弟處以待外解之至爲應時之給。弟婆娑一官原爲遼餉去復爲遼餉來幸與仁兄共事何敢自外於同心也。

答王峴璧書

弟春初一病幾無生理調理兩月始拊童背以行。一日薄暮文弱飛字報弟曰河南四十萬新餉至矣可健兩足弟以爲謹復冀其真再審果然舉手加額不覺其足之健也。自有新餉來此爲第一急公之舉原仁兄第一流人爲之天下何事不要人做也。細讀手札其苦楚處刺人腸其周折處隕人淚其感慨處又令人風生腋也。因想從來到極難處纔有極好事前人影樣一一可覆弟自恨病驅不能耐勞煩鄒靜長免發遼東略有短欠所差不遠皇甫簿自能口悉賈別駕之品一望而知然何莫非仁兄鼓舞之妙弟每與同志言肝膽風神如王年兄能使死物都活蓋偏得造化生氣無微不入卽王年兄亦不自知也鼎望

日隆建牙不遠何緣得藉重敵鄉爲易水燕山一吐精采乎

答袁位宇書

國家有福以遼事付台臺與遼終始一疏讀者無不流淚從來辦大事者先定規模台臺偉略合符古人遼事從此可望成功僕篝燈讀之拍案躍起舉手加額爲廟社慶恨不得百萬立發一步運到以應正月齊足之約以佐恢復撫順之用卽再具疏申前請求與台臺相應而留中如前殊不可解扣閽不應繼以扣閭密求斡旋未見動靜急之不能緩之不可與楊文弱議具疏求下九卿科道會議冀以滿朝之精神感通沖聖而亦未知作何狀也人微言輕徒切憤懣奈何奈何此事肯綮全在政府惟台臺圖利之

答蘇石水書

先生偏具冷眼於世所共棄之物不啻三顧使之鼓舞振迅而不能自已迺知大人君子盼睞中有鑪冶所謂不言而四時之氣行也區區一官原爲遼餉去復爲遼餉還苟利社稷敢愛頂踵而外解中斷索餉者環空庫而泣持此情以告朝貴落落難合兩疏叫天藉有協力者得帑金五十萬立刻發遼然此法殆不可復與楊文弱共計具疏求下廷臣會議未知結局何如也焦勞煩鬱一病幾死伏枕逾月尙未出門病骨自憐尙可言天下事乎說起周蓼洲眼前活現全賴先生寫意紫芝本像映人眉睫又歎世間清真氣味盡被藥籠收盡爾

